

四庫全書

史部

欽定四庫全書

史部

浙江通志卷一百五十三

詳校官給事中臣戴璐

檢討臣德生覆勘

總校官編修臣倉聖脉

校對官助教臣胡予襄

謄錄監生臣孔繼峰

欽定四庫全書

浙江通志卷一百五十三

名宦

紹興府

漢

任延

後漢書本傳字長孫南陽宛人更始元年為大司馬屬拜會稽都尉時年十九迎官驚其壯及

到靜泊無為唯先遣饋禮祠延陵季子會稽頗稱多士延到皆聘請高行如董子儀嚴子陵等敬待以師友之禮掾吏貧者輒分俸祿以賑給之省諸卒令耕公田以周窮急每時行縣輒使慰勉孝子

就餐飯之有龍邱菴者隱居大末志不降辱掾吏  
白請召之延曰龍邱先生躬德履義有原憲伯夷  
之節都尉灑掃其門猶懼辱焉召之不可遣工曹  
奉謁修書記致醫藥吏使相望於道積一歲菴乃  
詣府門願得備錄延遂署議曹祭酒菴尋病卒延  
自臨殯不朝三日是以郡中賢士大夫爭往宦焉  
建武初徵為  
九真太守

黃讜

弘治紹興府志汝南人建武四年為會稽太守  
辟郡人包咸為主簿遣子師之任督郵鍾離意

治屬縣救災卹  
患郡內大治

第五倫

後漢書本傳字伯魚京兆長陵人建武二十  
九年拜會稽太守雖為二千石躬自斬芻養

馬妻執炊爨受俸裁留一月糧餘皆賤買與民之  
貧羸者會稽俗多淫祀好卜筮民常以牛祭神百

姓財產以之困匱其自食牛肉而不以薦祠者發病且死先為牛鳴前後郡將莫敢禁倫到官移書屬縣曉告百姓其巫祝有依託鬼神詐怖愚民皆案論之有妄屠牛者吏輒行罰後遂斷絕百姓以安永平五年坐法徵老小攀車叩馬號呼相隨日才行數里不得前倫乃偽止亭舍陰乘船去衆知復追之及詣廷尉吏民上書守闕者千餘人會帝幸廷尉錄囚徒得免歸里元和三年賜策罷以二千石奉終其身

**馬稜**

後漢書本傳字伯威援之族孫肅宗以稜行義徵拜謁者永元二年江湖多劇賊以稜為丹陽

太守皆擒滅之轉會稽太守治亦有聲

**張霸**

後漢書本傳字伯饒蜀郡成都人年數歲知孝親鄉人號為張曾子永元中為會稽太守表用

處士顧奉公孫松等奉後為潁川太守松為司隸校尉並有名稱其餘有業行者皆見擢用郡中爭厲志節習經者以千數道路但聞誦聲霸始到越賊未解郡界不寧乃移書開購明用信賞賊遂束手歸附不煩士卒之力童謠曰棄我戰捐我矛盜賊盡吏皆休視事三年遷為侍中

慶鴻

後漢書廉范傳鴻洛陽人慷慨有義節位至會稽太守有異迹

馬臻

嘉泰會稽志永和五年為會稽太守創立鏡湖在會稽山陰縣兩界築塘蓄水高田丈餘田

又高海丈餘若水少則洩湖灌田如水多則閉湖洩田中水入海所以無凶年其陂塘周迴三百一十里溉田九千餘頃  
越人至今廟祀之

殷丹

嘉泰會稽志為會稽太守時郡有孝婦以誣見殺連旱二年丹到郡刑訟女祭婦墓天應時澍

雨

度尚

後漢書本傳字博平山陽湖陸人拜郎中除上虞長為政嚴峻明於發擿奸匪吏人謂之神明

延熹五年擢為荊州刺史後漢書注尚擢門下書佐朱雋恒歎述之以為不凡雋後官至車騎將軍

人奇尚有  
知人之鑒

劉寵

後漢書本傳字祖榮東萊牟平人拜會稽太守山民愿樸乃有白首不入市井者頗為官吏所

擾寵簡除煩苛禁察非法郡中大化徵為將作大匠山陰縣有五六老叟龐眉皓髮自若邪山谷間出人齎百錢以送寵寵勞之曰父老何自苦對曰山谷鄙生未嘗識郡朝他守時吏發求民間至夜不絕或狗吠竟夕民不得安自明府下車以來狗不夜吠民不見吏年老遭值聖明今聞當見棄去

故自扶奉送寵曰吾政何能及公言  
邪勤苦父老為人選一大錢受之

陳重

萬歷紹興府志宜春人與鄱陽雷義友  
世稱陳雷舉孝廉遷會稽太守有異政

淳于式

成化紹興府志建安中孫權表式為會稽太  
守時陸遜既平丹陽賊帥遂部伍東三郡強

者為兵羸者補戶得精兵數萬人式啟遜枉擾民  
及遜見權稱式佳吏曰式意在養民是以白遜

三國吳

顧雍

吳志本傳字元歎吳郡吳人州郡表薦弱冠為  
合肥長後轉在婁曲阿上虞皆有治績孫權領

會稽太守不之郡以雍為丞行太守事討  
除寇賊郡界寧靜吏民歸服封醴陵侯

朱桓

吳志本傳字休穆吳郡吳人孫權為將軍桓給  
事幕府除餘姚長往遇疫癘穀食荒貴桓分部



良吏隱視醫藥殮粥相繼士民感戴之遷盜寇校尉授兵二千人使部伍吳會二郡鳩合遺散期年之間得萬餘人黃武元年封嘉定侯

陸凱

吳志本傳字敬風吳郡吳人丞相遜族子黃武初為永興諸暨長所在有治績寶鼎元年遷左

丞相封嘉興侯

滕引

吳志本傳字承嗣北海劇人起家為丹陽太守徙吳郡會稽所在見稱三國志法引每聽辭訟

斷罪法察言觀色務盡情理人有窮冤怨苦之言對之流涕

車浚

萬歷紹興府志天璽初為會稽太守在官清忠值歲荒旱以表求賑貸見殺

晉

紀瞻

晉書本傳字思遠丹陽秣陵人以討周馥華軼功封都鄉侯除會稽內史時有詐作大將軍府

符收諸暨令令已受拘瞻覺其詐便破檻出之訊問使者果伏詐妄論討陳敏功封臨湘縣侯尋除

尚書右僕射

轉領軍將軍

諸葛恢

晉書本傳字道明琅邪陽都人元帝為安東將軍以為主簿再遷江寧令愍帝即位召為

尚書郎元帝上疏留之承制調為會稽太守臨行帝為置酒謂曰今之會稽昔之闕中足食足兵在於良守政之所先君為言之恢陳謝因對曰宜尊五美屏四惡進忠實退浮華帝深納焉大興初以政績第一詔曰會稽內史諸葛恢莅官三年政清人和為諸郡首宜進其位班以勸風教今增恢秩

中二千石

山遐

晉書山濤傳濤孫遐字彥林河內懷人為餘姚令時江左初基法禁寬弛豪族多挾藏戶口以

為私附遐繩以峻法到縣八旬出口萬餘豪強切齒以遐輒造縣舍遂陷其罪竟坐免官後為東陽

太守郡境肅然

謝奕

嘉泰會稽志字無奕陳郡陽夏人少有器鑒為刺令有一老公犯法謝以醇酒罰而遣之累遷

豫州刺史追贈鎮西大將軍

王彪之

晉書本傳字叔武初除佐著作郎後為鎮軍將軍會稽內史加散騎常侍居郡八年豪右

斂跡亡戶歸者三萬餘口

熊遠

晉書本傳字孝文豫章南昌人元帝作相時引為主簿累遷侍中出補會稽內史時王敦作逆

沈充舉兵應之如遠將軍距而不受不輸軍資於充保境安衆為務敦至石頭諷朝廷徵遠拜太常卿

### 南北朝

王鎮之

宋書本傳字伯重琅邪臨沂人父隨之上虞

令鎮之初為琅邪王衛軍行參軍出補剡上虞令並有能名內史謝輜請為山陰令復有殊績桓元以為大將軍錄事參軍時三吳饑荒遣鎮之銜命賑卹而會稽內史王愉不奉符旨鎮之依事糾奏愉子綏元之外甥當時貴盛鎮之為所排抑高祖踐阼為輔國將軍琅邪太守

褚淡之

南史本傳字仲原河南陽翟人宋受命為侍中後會稽郡缺乃用為會稽太守景平二年

富陽孫法先自號冠軍大將軍與孫道慶等攻沒縣邑建旗鳴鼓直攻山陰淡之遣陸邵水軍禦之而身率所領出次近郊敗賊於柯亭尋卒諡曰質

羊元保

南史本傳泰山南城人歷會稽太守文帝以元保廉素寡欲故授名郡為政雖無殊績而去後常見思不營財利產業儉薄

王淮之

南史本傳字元魯琅邪臨沂人宋武帝起兵為太尉主簿出為山陰令有能名預討盧循

功封都亭侯宋臺建除御史中丞為僚友所憚武帝受命拜黃門侍郎

徐豁

南史本傳字萬同姑幕人宋永初中為尚書左丞山陰令精練法理為時所推

謝方明

宋書本傳陳郡陽夏人高祖受命遷侍中出為丹陽尹有能名轉會稽太守江東民戶殷

盛風俗峻刻強弱相陵奸吏蜂起符書一下文攝相續方明深達治體不拘文法闊畧苛細務存綱領貴族豪士莫敢犯禁除比伍之坐判久繫之獄東土至今稱詠之承代前人不異其政必宜改者則以漸移變使無迹可尋元嘉三年卒官

江秉之

南史本傳字元叔濟陽考城人宋少帝時為烏程令以善政著名東土後為山陰令人戶

三萬政事繁擾訟訴殷積階庭常數百人秉之御繁以簡常得無事以在縣有能出補新安太守元嘉十二年轉任臨海並以簡約見稱所得秩悉散之親故妻子常饑寒人有勸其營田秉之正色答曰食祿之家豈可與農人競利在郡作書案一枚去官留以付庫

張裕

南史本傳字茂度吳郡吳人元嘉十八年除會稽太守素有吏能職事甚理卒於官謚曰恭子

顧凱之

南史本傳字偉仁吳郡吳人歷尚書都官郎後為山陰令山陰劇邑三萬戶前後官長晝

夜不得休事猶不舉凱之御繁以約縣用無事晝日垂簾門階間寂自宋世為山陰務簡而事理莫

能尚也後為尚書吏部郎

卞延之

南史卞彬傳彬濟陰宛句人父延之弱冠為上虞令有剛氣會稽太守孟顗以令長裁之

積不能容脫憤投地曰我所以屈卿者政為此憤耳今以投之卿矣卿以一世勲門而傲天下國士

拂衣而去

王晏

嘉泰會稽志為上虞令孔覲自會稽發兵反晏起兵攻郡覲卒千人趨石鵪竄於山嵛村村人

縛以送晏斬之東閣外

王僧虔

南史本傳僧緯弟也泰始中為吳興太守徙會稽太守中書舍人阮佃夫家在東請假歸

客勸僧虔以佃夫要幸宜加禮接僧虔曰我立身有素豈能曲意此輩彼若見惡當拂衣去耳佃夫言於宋明帝使御史中丞孫覿奏僧虔坐免官昇明二年為尚書令齊武帝即位遷侍中光祿大夫

開府儀

同三司

洪現

會稽國經官會稽太守既罷不欲令人知其清乃以船載土而歸

傅琰

南齊書本傳字秀珪北地靈州人在宋為諸暨武康令除吳興郡丞泰始六年遷山陰令山陰

東土大縣難為長官父僧祐在縣有稱琰尤明察又著能名其年爵新亭侯元徽初遷尚書右丞太祖輔政以山陰獄訟煩積復以琰為山陰令賣鐵賣糖老姥爭團絲來詣琰琰不辨覈縛團絲於柱



鞭之密視有鐵屑乃罰賣糖者二野父爭雞琰問何以食雞一人云粟一人云豆乃破雞得粟罪言豆者縣內稱神明無敢復為偷盜諸傳有治縣譜子孫相傳不以示人

### 周顯

南齊書本傳字彥倫汝南安成人元徽中詔為剡令有恩惠百姓思之建元初為長沙王後軍

叅軍山陰令縣舊訂滂民以供雜使顯言之於太守聞喜公子良曰竊見滂民之困困實極矣役命有常祇應轉竭蹶迫驅催莫安其所險者或竄避山湖困者或自經溝瀆亦有摧臂斫手苟自殘落敗傭貼子權赴急難每至滂使發動遵赴嘗促輒有植杖被縕稽顙階垂泣涕告哀不知所振下官未嘗不臨食罷筋當書偃筆為之久之愴不能已交事不濟不得不就加捶罰見此辛酸時不可過山陰邦治事倍餘城然畧聞諸縣亦處處皆蹟惟上虞以百戶一滂大為優足過此列城不無彫罄

宜應有以普救倒懸設流開  
便則轉患為功得之何遠

蕭暉

南史本傳字宣昭高帝第五子也建元二年為  
會稽太守加都督武帝即位歷中書令祠部尚

書性輕財重義有古人風罷會稽還都齋中錢不  
滿萬俸祿所入皆與參佐賓僚共之常曰兄作天  
子何畏弟無錢居  
止附身所須而已

陸慧曉

南史本傳字叔明吳郡吳人齊高帝輔政除  
為尚書殿中郎建元初遷太子洗馬及武陵

王守會稽上為精選僚吏以慧曉為功曹與府參  
軍沛國劉璉同從述職復為西陽王左軍長史領  
會稽郡丞行郡事慧曉歷輔五政立身清肅僚佐  
以下造詣必起送之或謂慧曉曰長史貴重不宜  
妄自謙屈答曰我性惡人  
無禮不容不以禮處人

顧憲之

南史本傳凱之孫字士思性尤清直宋元徽中為建康令時人號曰神明仕齊為東中郎

長史行會稽郡事山陰人呂丈度有寵於齊武帝於餘姚立邸頗縱橫憲之至郡即日除之丈度後還葬郡縣爭赴弔憲之不與相聞時西陵戍主杜元懿以吳興歲儉會稽年登商旅往來倍歲西陵牛埭稅官格日三千五百求加至一倍計年長百萬浦陽南北津及柳浦四埭乞為官領攝一年格外長四百許萬武帝以示會稽使陳得失憲之議曰尋始立牛埭非苟通餽以納稅也當以風濤迅險人力不捷濟急以利物耳既公私是樂故輸直無怨京師航渡即其例也而後之監領各務已功或禁遏別道人生理外凡如此類不經埭煩牛者上詳被報蒙停格外十條從來喧訴始得暫弭案吳興頻歲失稔今茲尤饑去乏從豐良由饑棘舊格新減尚未議登格外加倍將以何術皇慈恤隱

振廩蠲調而元懿幸災權利重增困瘼人而不仁古今共疾山陰一縣課戶二萬其人資不滿三千者殆將居半一人被攝十人相追一緒裁萌千孽互起蠶事弛而農業廢賤取庸而貴舉責應公贍私日不暇給欲無為非其可得乎又永興諸暨羅唐寓寇擾公私殊燼彌復特甚倘逢水旱實不易思俗諺云會稽打鼓送恤吳興步擔令史會稽舊稱沃壤今猶若此吳興本是瘠土事在可知因循餘弊誠宜改張武帝並從之由是深以方直見知憲之雖累經宰郡資無擔石及歸環堵不免饑寒王詢嘉奉會稽志永泰初為山陰令太守王敬則將舉兵反召詢問吾欲發丁丁可得幾人府庫錢有幾詢答縣丁卒不可得府庫物多未輸入敬則怒將出斬之

劉元明

南史傳琰傳臨淮劉元明亦有吏能歷山陰令政為天下第一終司農卿後傳琰子翺代

元明為山陰令問元明曰願以舊政告新令尹答曰我有奇術卿家譜所不載臨別當相示既而曰作縣令唯日食一升飯而莫飲酒此第一策也

**庾華**

梁書本傳字休野新野人為驃騎功曹參軍出為輔國長史會稽郡丞行郡府事時承彫弊之

後所在穀貴民多流散華撫循甚有治理唯守公祿清簡逾屬至經日不舉火太守襄陽王聞而饋之華辭不受天監元年卒無以殮柩不能歸高祖詔賜絹百匹米五百斛

**江革**

南史本傳字休映濟陽考城人中年梁武帝入石頭令與徐勉同掌書記除武陵王長史

會稽郡丞行府州事革門生故吏家多在東聞革應至並賁持緣道迎候革曰我通不受餉不容獨當故人筐篚至鎮唯資公俸食不兼味郡境殷廣辭訟日數百革分判辨析曾無疑滯人安吏畏百

城震恐琅邪王騫為山陰令贓貨狼籍望風自解  
除都官尚書將還贈遺一無所受唯乘臺所給一  
舸舸艚偏敝不得安臥或請濟江徙重物以迂輕  
艚革既無物乃於西陵岸取石十餘片以實之其

清貧  
如此

蕭元簡

冊府元龜為會稽太守時何商隱居東山  
元簡深加禮數月常命駕式閭談論竟日

劉沓

南史本傳字士源天監中累遷尚書儀曹郎出  
為餘姚令在縣清潔湘東王繹發教褒美之

褚玠

陳書本傳字溫理河南陽翟人大建中山陰縣  
多豪猾前後令皆以贓污免高宗謂中書舍人

蔡景歷曰稽陰大邑久無良宰卿文士之內試思  
其人景歷進曰褚玠廉倫有幹用未審堪其選否  
高宗曰甚善卿言與朕意同乃除戎昭將軍山陰  
令縣民張次的王體達等與諸猾吏賄賂通姦全

丁大戶數多隱沒玠乃鎖次的等具狀啟臺高宗  
手勅慰勞并遣使助玠搜括所出軍民八百餘戶  
時舍人曹義達為高宗所寵縣民陳信家富於財  
諂事義達信父顯文恃勢橫暴玠乃遣使執顯文  
鞭之一百於是吏民股慄莫敢犯者信後因義達  
譖玠竟坐免官玠在任歲餘守祿俸而已去官之  
日不堪自致因留縣境種蔬築以自給或嘆玠以  
非百里之才玠答曰吾委輸課最不後列城除殘  
去暴姦吏局跡若謂其不能自潤脂膏則如來命  
以為不達從政吾未服也時人以為信然皇太子  
知玠無還裝手書賜粟米二百斛於是  
還都及為御史中丞甚有直繩之稱

## 唐

姚崇

張說姚崇神道碑字元之洛陽人中書令出典  
越郡性仁恕行簡易虛懷汎愛而涇渭不雜真

率徑盡而應變無窮常推是心以御於物故所蒞必毗庶風偃驚狠化從言不勵而教成政不威而事理去思觀頌來暮聞歌

李俊之

嘉泰會稽志開元中為會稽令縣東北有防海塘自上虞江抵山陰百餘里以瀦水溉田

俊之增修焉民賴其利後令李左次又增修之

郭密之

萬厯紹興府志天寶中令諸暨建義津橋築放生湖溉田二千餘頃民便之

王士寬

白居易王士寬墓誌太原人天寶中應明經舉及第選授婺州義烏尉以清幹稱刺史韋

之晉知之署本州防禦判官無何假東州司倉專掌運務歲終課績居多永泰中遷越府戶曹屬邑有不理者士寬假領之所至必理大厯中本道觀察使薛兼訓以士寬清白尤異表奏之有詔權知



餘姚縣令時海寇初殄邑焚田荒士寬乃營邑室創器用復流庸闢菑畬凡江南列邑之政士寬冠其首其制邑闢田增戶之績則會稽之課地官之籍載焉建中初選授揚州倉曹叅軍

**金堯恭**

萬歷紹興府志寶歷中令上虞堯恭於縣西北置任嶼湖與梨湖灌田二百餘頃興利除

害民甚德之

**崔協**

嘉靖浙江通志博陵人大中元年以戶曹攝上虞值歲大旱民賦無所出協請蠲於上不許遂

傾家資代輸之及卒邑人立廟祀之

**張遜**

嘉泰會稽志乾寧初為山陰令董昌反署置百官召遜知御史臺遜拒曰王自棄為天下笑且

六州勢不助逆王據孤州祇速死爾昌怒曰遜不知天意以邪說拒我囚之他日謂人曰我縱無遜

何乏於事乃害之會稽  
令吳錄亦為昌所殺

宋

張公良

弘治紹興府志字希留太平興國中為新昌  
令立縣治興學校廉以律已卒不能歸民卜

地葬之名

曰官所

杜守一

嘉泰會稽志景德二年以大理丞知蕭山先  
是縣東五里有虎守一為政虎負子西渡浙

江而去鄉人名  
其里曰去虎里

蘇壽

萬厯紹興府志武功人大中祥符初以大理丞  
出知蕭山明剛柔審利害人稱其治天聖九年

復知越州摧強燭弊  
曾未期月威聲大振

丁寶臣

王安石丁寶臣墓誌字元珍晉陵人景祐中以進士起家用舉者遷太子中允知越州剡

縣始至流大姓一人而縣遂治除弊興利甚衆遷博士就差知越州諸暨縣其治諸暨如剡越人滋以寶臣為循吏累遷尚書司封員外郎嘉靖浙江通志寶臣之後有令錢厚之當建炎中奏減買絹四之三以紓暨人之困姜紹請粟於朝得萬餘石以賑暨人之饑又劉炳疏免淘金之役

寇仲溫

萬厯紹興府志慶厯初令諸暨未明視事亭午皆畢興學校廢淫祠父老稱之

曾公亮

宋史本傳字明仲泉州晉江人舉進士甲科知會稽縣民田鏡湖旁每患湖溢公亮立斗

門泄水入曹娥江民受其利嘉祐六年拜吏部侍郎同中書門下平章事集賢殿大學士熙寧二年進昭文館大學士以太保致仕

過昱

萬歷紹興府志一名公彥皇祐初以祕書丞出令剡歲饑流民集城下昱勸富家出粟賑之明

年又饑乃出常平錢請糴取其贏米幾萬斛與流民又割俸麥為種役饑民耕種官田明年得麥五百斛復與流民使歸復業流民感激而去

王逵

萬歷紹興府志濮陽人皇祐初知越州濬治城隍布宣政令志有執持果於興革大為曾鞏所推服西園有池名曰王公蓋越人致其思云

胡向

萬歷紹興府志清江人皇祐進士倅越州奏課為天下第一後官大理卿決獄仁恕為時所稱

任布

宋史本傳字應之河南人進士及第知宿州時越州守闕寇準曰越州有職分田歲入且厚今

爭者頗衆非廉士莫可予乃徙布越州有祖訟其孫醉酒詈我已而自悔哭於庭曰我老無子賴此

孫以為命也布聞知貸其死上書自劾朝廷亦不  
之責歷樞密副使授太子少保致仕卒謚恭惠

**蔣堂**

東都事畧字希魯常州宜興人舉進士第為河  
南發運使降知越州州有鑑湖溉田八千頃前

此為郡者聽民自占既而多為豪右所侵水利寔  
耗堂後上所不便奏復之復知杭蘇二州以禮部

侍郎  
致仕

**郭源明**

嘉泰會稽志字潛亮嘉祐六年知蕭山縣縣  
之宿豪有父子為奸利者悉置於法民有育

孤女利其資過時不嫁者諭以禮律女遂得  
所歸太守刁約聞之曰郭蕭山厭民望矣

**曾鞏**

韓維曾鞏神道碑字子固南豐人嘉祐二年登  
進士第通判越州屬歲饑鞏興積藏通有無老

稚不出里間果腹而嬉元豐五年擢拜中書舍人  
以翰林學士卒於越新編越舊取酒務錢給募牙

錢不足則賦諸鄉戶輦亟罷之歲饑度常平不足又慮民不能盡至城邑乃諭富人使攜粟住予民民得不出田里而受粟又貸之種使隨秋稅以償民食其惠輦政事過人所至務去民疾苦文章與歐陽修齊名世  
稱南豐先生云

王存

宋史本傳字正仲潤州丹陽人慶歷六年登進士第調嘉興主簿擢上虞令豪姓殺人久莫敢問存至按以州吏受賕豪賂他官變其獄存反罷去久之除密州推官紹聖初以右正議大夫致仕

司馬光嘗曰並馳萬馬中能駐足者其王存乎

張詵

宋史本傳字樞言建州浦城人第進士通判越州民患苦衙前役詵科別人戶籍其當役者以

差人錢為雇人充皆以為便元豐初  
加龍圖閣直學士累官正議大夫

鄭穆

宋史本傳字閑中福州侯官人舉進士四冠鄉書遂登第元豐三年出知越州先是鑑湖旱乾

民因田其中延袤百里官籍而稅之既而連年水溢民逋官租積萬緡穆奏免之元祐五年除寶文

閣待制六

年請老

李子筠

嘉靖浙江通志為餘姚主簿初有茶商航海與海舶相遭更疑為盜相格鬪殺傷十餘人

久繫不決太守趙抃檄子筠治之子筠曰犯時不知在律勿問杖而遣之抃大稱賞

程師孟

宋史本傳字公闢吳人進士甲科知越州為政簡而嚴罪非死者不以屬吏發隱摘伏如

神得豪惡不遑跌宕者必痛懲艾之所部肅然

游酢

宋史本傳字定夫建州建陽人第進士調蕭山尉近臣薦其賢召為太學錄遷博士晚得監察

御史於越新編醉天聖中任蕭山辨決  
疑獄人稱神明在官數年德惠旁洽

劉幹

宋史本傳字仲偃建州崇安人第進士知越州  
鑑湖為民侵耕官因收其租歲二萬斛政和間

涸以為田衍至六倍隸中官應奉租太重而督索  
嚴多逃去則勒鄰伍取償民告病幹請而蠲之方  
臘陷衢婺越大震官吏悉遁或具舟請行幹曰吾  
為郡守當與城存亡不為動益厲戰守備寇至城  
下擊敗之拜述  
古殿直學士

沈公調

弘治紹興府志宣和間為越州士曹掾會方  
臘亂太守劉幹募民得賊首一級賞錢二萬

公調諫曰小人規利或殺平民以希賞不如令生  
擒而倍其賜自是民或俘賊以獻幹即命公調覈  
之但誅其附賊者餘誤  
執皆免所活數千人



宋旅

宋史本傳字庭實莆田人第進士累官奉議郎知剡縣方臘既陷歛睦杭衢婺五州且犯越

盜亦起應之縣吏多遁旅遣妻子浮海歸閩獨與民據守以忠義激勸部勒隊伍為豫備計俄而盜衆大至至躬率壯銳冒矢石雖頗殺獲終以力不敵死之越帥劉韜上其事詔贈朝散郎錄其四子

宇文昌齡

嘉靖浙江通志字伯修成都人舉進士并御史徽宗立以實謨閣侍制歷知杭越經

理部政公私便之

張守

宋史本傳字子固常州晉陵人登崇寧元年進士第中詞學兼茂科建炎三年除起居郎兼直

學士院後徙知紹興府會朝廷遣三使者括諸路財賦所至以鞭撻立威韓球在會稽所斂五十餘萬緡守既視事即求入覲為上言之詔追還三使時秦檜當國不悅守奉祠建康卒謚文靖

李邴

周必大李邴神道碑字漢老濟州鉅野人崇寧五年進士除徽猷閣待制知越州為政清簡抑

強扶弱後為  
資政殿學士

綦崇禮

宋史本傳字叔厚高密人登重和元年上舍第嘗進唐太宗錄刺史姓名於屏風故事曰

連千里之封得一良守則千里之民安環百里之境得一良令則百里之民說以寶文閣直學士知紹興府時劉豫導金人入侵揚楚震擾高宗躬御戎衣次吳會崇禮以近臣承寧方面謂浙東一道為行都肘腋之地備禦不可不謹密疏於朝得便宜從事於是繕城郭厲甲兵輸錢帛以犒王師簡舟艦以扼海道疚心夙夜殆廢食寢及春帝還七州晏然不知羽檄之遽期年上印綬退居台州卒

贈左朝  
議大夫

趙鼎

萬歷紹興府志字元鎮聞喜人以尚書右僕射兼知樞密院張浚與鼎睽異鼎求去出知紹興

府恤吏愛民不以故相自奉未幾復相秦檜主和議與鼎不合竟謫潮州安置孝宗朝追諡忠簡

宋宗年

萬歷紹興府志郊之孫建炎中令刻金人政越守李鄴以城降屬邑皆潰宗年城守獨堅

民賴以安官至中散大夫因家於剡

張友直

宋史張士遜傳友直字益之陰城人賜進士出身累遷工部郎中知越州州民每春斂財

大集僧道士女謂之祭天友直下令禁絕即取所斂財建學以延諸生

陳休錫

趙不搖

萬歷紹興府志先後令上虞並加意水利疏聞於上禁民不得淤湖

為田自是他邑或病旱獨上虞得湖水屢稔民甚德之

林安宅

於越新編閩三山人紹興中知新昌改建學宮置田養士諸廢墜無不修舉築東堤以禦

水患浚七里井開孝行碑決縣渠自南門入郭出西門與礮水合以溉民田自宋中興有功於縣者安宅為最累官尚書叅知政事

熊克

宋史本傳字子復建陽人御史大夫博之後紹興中進士知諸暨縣越帥課賦頗急諸邑率督

趣以應克曰寧吾獲罪不忍困吾民他日府遣幕僚閱視有無時方不雨克對之泣曰此豈催租時耶部使者芮輝行縣至其境謂克曰曩知子文墨而已今乃見古循吏為表薦之

王師心

弘治紹興府志紹興二十八年知紹興府時欲遷祔陵二十里內士民故塚師心固爭乃

止獲免者七百餘家又薦獻之物舊取於民師心請以上供錢給直民皆便之

葉顥

宋史本傳字子昂仙遊人紹興元年進士知上虞縣凡徭役令民自推貨力甲乙不以付吏民

欣然皆以實應催租各書其數與民約使自持戶租至庭親視其入帥曹泳令今歲夏租先期送十之八顥請少舒其期泳怒及麥大熟民輸租反為諸邑最泳大喜許薦於朝顥固辭賀正中薦顥靜退遂召見顥論語剗切高宗嘉納除將作監簿知處州青田令陳光獻羨餘百萬顥以所獻充所賦湯思退之兄居處州家奴屠酤犯禁一繩以法思退不悅移知常州召為尚書郎歷尚書左僕射兼樞密使謚正簡萬歷紹興府志子元泳復令上虞助田養士人稱濟美

張暉

萬歷紹興府志淳熙中知蕭山會諸暨水溢詔開紀家滙浚蕭山新江以殺水勢暉上言諸暨

地高蕭山地下山陰則沿江皆山疏小江可導諸暨之水欲浚新江其底石堅不可鑿若開紀家滙

則水徑街蕭山桃源等七都田廬為沼矣時蔣芾為浙東提刑主諸暨之請欲開匯暉力爭曰暉頭可斷匯不可開乃止

**黃由**

萬歷紹興府志字子由長洲人淳熙中進士第一通判紹興督行荒政於新嵎改糴為賑擅發

米五萬石予民不取直嘉定初以正議大夫知紹興府聞嵎有虎患訛言虎有神變化叵測或為僧或為猿但儻忽莫可踪跡由禱於神募人捕之殄滅無遺官至刑部尚書兼直學士院贈少師

**張震**

兩浙名賢錄字彥亨魏公浚五世孫乾道己丑登進士歷院轄寺丞知撫州江西倉以不附韓

侂冑論罷嘉定初召為右司郎官奉祠不復出時論以正人目之娶會稽曾文清公女其子遠猷後為紹興太守因家於越

王希呂

宋史本傳字仲行宿州人既仕寓居紹興府乾道五年登進士科除端明殿學士知紹興

府尋以言者落職處之晏如治郡百廢俱興尤敬禮文學端方之士天性剛勁遇利害無回護意惟是之從居官廉潔至無屋可廬由紹興歸有終焉之意然猶寓僧寺上聞之賜錢造第

袁說友

李大性

嘉泰會稽志嘉泰元年四月說友以寶文閣學士知紹興府十二月

大性以禮部侍郎華文閣待制知紹興府萬厯紹興府志說友大性相繼為守並有善政會稽郡志之成實前守趙不迹及說友始終之而大性宅心仁厚修舉社倉法廣營義塚尤為越人所思

趙彥俠

宋史本傳字安卿知臨安於潛縣縣胥往往通臺省吏得肆其奸彥俠執其黠者械送府

臺省吏從中救之彥俠力爭竟抵胥罪浮橋屢以水敗彥俠築以石民免溺死陞臨安府通判開禧

初知紹興府楮價輕彥使權以法民便之復鹿鳴禮置興賢莊以資其費築捍海石塘亦置莊以備增築會旱饑民聚陂湖中彥俟取死囚幕首則足徇於衆曰此刳羨竊者也遂散其衆乃第民高下捐其稅有差免輸湖籍田米舉緡錢四十萬以助荒政民賴以濟

劉伯曉

於越新編山陽人嘉定中令諸暨值雷雨累日夜洪水交作漂民畜田舍無算伯曉掩泣

奔救力請於朝得蠲稅一年田之不可復者除其籍

張遠猷

山陰縣志字辰卿四川綿竹人景定改元錄張拭後以蔭補官三年知紹興府時賈似道

秉政造私第於山陰縣治之西官吏過其門者皆出車下馬如王府例遠猷迂道避之鏡湖田旱潦不時遠猷留心溝洫一遵馬臻遺制築堰修閘農民賴以有秋五年報政加中大夫賜緋衣金魚袋



致仕四川道梗遂卜居  
山陰卒葬雲門石人山

魏了翁

萬歷紹興府志字華甫嘉熙初以資政殿學士知紹興初了翁與真德秀同名為翰林學

士在朝凡上二十餘疏皆當時急務乃卒為忌者所排擯到郡未幾卒越人哀之

丁疇

於越新編晉陵人淳祐中令新昌時歲荒太守命賑之疇曰欲行荒政宜緩催科欲恤貧民宜

優上戶乃緩刑薄斂平糴勸分有無相資歲賴以不害己又作新學校制器置田文教聿起

楊參

萬歷紹興府志為越州錄事時郡多盜太守督責保長甚嚴一日有盜入民家其主執之以送

保長保長素苦盜以木杖擊殺之守更坐保長以殺人罪獄既具遣參按狀得實平反免死越人頌之

欽定四庫全書

卷一百五十三

留恭

萬歷紹興府志字伯禮永春人丞相正次子初官浙西值大饑畢力賑恤全活甚衆後知紹興

時稱循吏初正亦知紹興人謂父子濟美云

家坤翁

於越新編眉州人寶祐間令諸暨能文章好獎掖儒彥甚有政績嘗築長官橋為長堤障

水植柳其旁人號家公萬柳堤

張珣

於越新編南軒之裔開慶初以進士知新昌當是時民財匱於兵而倖臣柄國者專事苛斂珣

守正不阿寬徭節用雖獲譴不顧元兵南下珣團結義勇為固守計後卒於官子孫家焉

元

張昇

元史本傳字伯高其先定州人後徙平州除紹興路總管初大德至大間越大饑且疫痛賦稅

鹽課責里胥代納吏並緣為姦昇為証於簿籍白  
行省蠲之前平江歲輸海運糧布囊三萬俾紹興  
製如數民患苦之更數守謂歲例如此置勿問昇  
言麻非越土所生海漕實吳郡事於越無與章上  
卒罷之昇既謹於繩吏又果於去民瘼故  
人心悅服至順二年為集賢侍講學士

宋文瓚

嘉靖浙江通志紹興路總管恩威  
並施事無不理及去任越人思之

劉輝

於越新編汴人為餘姚州同知郡守下輝均田  
賦時州籍失火豪猾乘時詭匿輝手植二柏禱

之曰事成柏榮不成則否乃躬履田畝置魚鱗圖  
鼠尾冊定等平役按畝給由出匿田萬餘畝初輝  
受撤出舍焦勞鬚髮為改及是賦  
均柏榮吏民愛之比於甘棠焉

馮翼

於越新編濟寧人元貞初知諸暨州始至察民  
隱鋤擊奸豪鄉胥有舞文增稅者悉釐正之民

病山園稅重遂多拋荒乃請於總管但以中統鈔准輸田租而免山園之稅又奏罷採金之役政暇輒引諸生講論經史使州吏環聽皆凜凜色動及去任民遮留不得建祠祀之

謹按舊志作米德孚未知何據存以俟考

余洪

嵎縣志字仲寬益都人元貞初尹嵎嵎夏稅絹洪請得納鈔減費之半先是田稅重而山與地

不科洪為均之民稱便為人廉介明決為民蘇困救弊

于九思

於越新編薊邱人大德間知諸暨州俗好訐牒訴紛然九思密察情偽得其尤無良者痛

繩之飭厲學校選擇秀茂示以禮讓罰譴寢哀或言地產水晶砂金調民丁採之闔境騷動九思力陳無產狀遂罷其役後為紹興路總管號良二千石

單慶

於越新編濟寧人大德間知諸暨歲饑且疫慶曲盡救災之策民感更生慶益接以寬和有爭

於庭者進而兒女語之皆慚沮去盜化為良鞭箠幾措有虎入市慶為文告城隍三日虎死浙東蝗飛蔽天入境咸抱竹瓦歲且屢登及卒民皆巷哭挽柩而送者數千人

張垕

萬歷上虞縣志字德修成都人至治中尹上虞廉潔無私請托不行新學贍士嚴禁私陂邑以

治聞

李恭

萬歷紹興府志字敬甫閩隴人知姚州廉平不苟又習文法吏奸不得行時州民役於官者歲

終乃代廢其生業恭為更定每季代之州產紅米官令市白米充稅恭疏請聽以土產上輸營建廟學乞增置師弟子員每與論難經義墾湖田數百畝益其廩士民戴之

李拱辰

黃潛李拱辰墓誌字廷弼磁州人至大元年遷新昌縣尹歲饑道殣相望乃稽貧民之數

老弱者賑給之少壯者俾富家收而傭之疾疫者救療之所全活甚衆患經界之不正則考覈其實而圖其地形書其保甲編次鱗集印分兩券官執其左戶執其右鬻產則券隨之隱沒詭併之弊無所容而賦役以均邑去郡遠舟楫不通民疲於輸糧請以土產布代其入俗惑於陰陽拘忌親死數十年不葬下令不葬其親者以不孝論不旬日而葬者千數有鬪爭悉送耆長使質其是非而戒論焉或委以鄰境不決之獄凡所平反無不服其明允大修孔子廟新其學舍至縣廨驛亭川梁遠路有廢畢舉皇慶二年改歸安縣尹有爭家財而骨肉相戕者諭以天理感悟而去有以死獄誣平民者折以片言遂服其辜先是圭田多荒責里胥代輸其租拱辰屏吏卒入阡陌視地肥瘠定為歲入之

數募有力者墾種之有旨經理田土奉行者率務增加以為功拱辰聽民自占主者以所增田僅百五十頃議倍其賦拱辰曰吾官可棄民不可病也省臺交章舉廉能延祐六年擢監察御史

**呂誠**

弘治紹興府志字實夫皇慶初為會稽尹莅政循良民服其化

**哈喇蘓默**

於越新編輝和兩人至元間新昌達魯噶齊時浙鹽法峻豪猾賁緣為奸蘇默得其狀

馳白運司婺州賊楊振龍突入新昌焚掠千戶崔武德戰死蘇默獨鼓衆力戰連日夜不解賊敗走三月賊唐仲復聚衆來寇蘇默遣間聲言大軍且至隨率數十騎襲賊於五峯嶺賊驚散蘇默會兵討振龍餘黨盡降其衆新嵎兩邑疆宇復完

**高閻**

萬歷紹興府志蒙古人至大二年嵎達魯噶齊政尚嚴肅裁吏卒之冒濫者若干人鎮守千戶

縱戍卒擾民間以法繩之尋白帥府罷鎮守司民獲安堵與尹萬愿相規以正並稱循良間之後有嘉琿達者集資人泰定初達嚕噶齊能潔己愛民以糧稅輸郡道路艱阻請折以布民感其惠

趙誠

於越新編宛平人薄蕭山為民捍禦災患有政績既罷官遂家蕭山邑人祀之

托克托

萬厯紹興府志字子安燉煌人餘姚州達嚕噶齊為人廉明持重莫能窺其際及事至及解斧

斷張弛得宜

圖卜特穆爾

黃潛圖卜特穆爾墓誌字可與蒙古遜都台氏世祖命相臣總兵伐宋圖卜特穆爾以管

軍萬戶實預在行渡江後加金虎符為湖廣等處行樞密院判官延祐二年遷宣武將軍泰定三年轉明威將軍分城坐鎮自明而越前後三十餘年越人蔡定父年七十餘以事繫獄定請以身代不



報乃自沈府河以死郡為立廟臥龍山之麓歲久廟廢居民侵其地官不之省圖卜特穆爾攝萬戶事慨然曰孝子不祀人奚以勸即日歸其侵地廟以完復元兵至天台民婦王氏為軍士所得不辱至剡之清風嶺投崖死圖卜特穆爾移文有司為立廟剡有隱士吳君與圖卜特穆爾友善既卒貧不能喪輟俸資葬於書院之側其好義如此

### 王正

紹興府志霑化人父簡為烏程尹至元中移知福寧州禦賊力戰死立不仆無血惟白沫而已

事聞贈太原郡侯正襲爵授紹興路總管張士誠陷郡亦不屈而死

### 王璘

弘治紹興府志字景文臨沂人至元末為上虞知縣冰蘗自守刑不妄施獄屢告空優老興學

人皆德之

巴蘓呼

萬歷上虞縣志至正中達魯噶齊時同僚皆尚嚴刻思忽以寬濟之事集而民悅民田有

坍江者稅額未除皆優使輸布他邑有疑獄不能決憲府檄令讞之有持執政風旨俾上下其手者思忽不聽枉直無所失邑人稱之又有佛嘉努亦為監邑政令不擾四境晏然

鼎鼎

萬歷紹興府志字君輔輝和爾氏至正間為山陰縣達魯噶齊均賦興學表賢良明教化吏民稱之

李睿

萬歷紹興府志字星明武平人至正間尹上虞和易有守歲久旱方病目弗顧周視阡陌免其租稅嚴湖禁重兵防民賴以安秩滿居於虞卒葬焉

於善

蕭山縣志至正間尹蕭山性寬和率民以禮作新學校築堤捍水民受其利後家於長山鄉

傅常

嘉靖餘姚縣志字仲常鉛山人舉進士至正十一年調餘姚判官視州符奸沮滯決吏民服之

海上有警宣聞檄常偵賊定海而常所統徒民兵與賊遇弗敵死之常居官有冰蘖聲其母及兄貧

不能歸遂家於姚

裴思聰

萬厯紹興府志至正間尹蕭山務以德化民天旱蔬食退居引罪自責雨輒沾足張士誠

據浙遂棄官居嘉興士誠厚聘之不受

周舜臣

萬厯會稽縣志至正十九年尹會稽莅政公勤廢陞修舉田稅宿弊靡不釐革民畏愛之

彭仲宣

弘治紹興府志至正末為會稽丞政平訟理居民樂業時有主簿毛彥穎執法不阿人呼

為鐵主簿

戴正

弘治紹興府志鄱陽人元末丞山陰年甫十九清慎有守政尚寬平時民多詭冒正履畝注主

名根由驗步精  
震而民不擾

趙元齡

萬歷上虞縣志字子年宛邱人尉上虞先是縣官收職米倍三佃者病之元齡獨無升勺

過取土兵隸於司者視之如子秋毫不擾於民時人為之語曰縣尉不要錢只有趙子年

穆爾古蘓

元史舒穆魯宜孫傳穆爾古蘓寧夏人字善卿至正十四年進士授紹興路錄事司達

魯噶齊苗軍主將楊完者在杭縱軍鈔掠至紹興城中強奪人馬穆爾古蘓擒斬數人苗軍懼不敢復至其境會江南行臺移治紹興檄為行臺鎮撫乃大募民兵為守禦計處州山賊焚掠婺之永康東陽提兵往擊之與舒穆魯宜孫約期夾攻擣其巢穴山賊以平擢江東廉訪司經歷仍留紹興以兵

衛臺治時浙東西郡縣多殘破獨穆爾古蘇保障  
紹興境內晏然民愛之如父母授行樞密院判官  
分院治紹興後為御史大夫拜珠格  
所殺監察御史珍通糾之寃始白

明

樂鳳

於越新編高郵人元至正末知諸暨州及明兵  
下諸暨仍以鳳知州事時州民初附軍士下鄉  
索糧民不勝擾鳳乃置倉出納上下便之院判謝  
再興謀叛以兵脅鳳鳳不屈刀加頸氣益厲鳳妻

王氏以身翼  
蔽皆死之

唐鐸

於越新編虹縣人洪武初授西安縣丞歷知紹  
興御下以誠人不忍欺凡徵賦有非土產者悉  
奏罷之餘姚上虞爭夏蓋湖水利經歲不決  
鐸至斷以至公民皆悅服官至刑部尚書

崔東

明一統志洪武初山陰知縣賦均事簡有治聲民思之

戴鵬

明一統志洪武初任會稽知縣清慎自守時軍駐四明鵬往供饋餉期限嚴急率民步行日晡

饑甚從者進餅却不受掬道傍水飲之

王宗仁

明一統志洪武初會稽知縣莅政廉明吏畏民懷滿去父老擁馬幾不得行

田賦

於越新編蒲圻人洪武初知諸暨時兵燹之後官吏皆寄宿民家賦夙夜經畫招撫流散墾闢

草萊興起學校無不竭心力而營建亦稍備焉

張懋

蕭山縣志洪武初知蕭山重農恤民尤注意湘湖水利為圖記刻石今存於儀門之左

趙允文

弘治紹興府志鄞城人洪武元年為上虞知縣招撫流散差定賦役民樂吏化邑里晏然

曾衍文

舊浙江通志廬陵人洪武初為新昌主簿勤惠廉潔甚著聲稱著有濮泉稿

陽春

舊浙江通志洪武中尉山陰清勤有幹局晨起視事日晏未罷惟吸糜而已隆冬無衣長官以

衣衣之受而不  
服其介如此

鄒魯

萬厯會稽縣志鳳陽人洪武中會稽典史釋滯理冤輕刑緩役招集流亡父老奏魯治有異績擢知本縣廣寧衛鎮撫趙興以公事至為人私請不從誣逮刑部事直上嘉其守擢大理丞

高孜

嵎縣志洪武七年任嵎縣涖政明敏愛民如子三載卒於官丁壯號哭老人兒啼為葬北門外

星子  
峯下

周文祥

成化新昌縣志淮安人洪武元年任新昌知縣廉能剛決為政有方縣自兵餘官民舍宇

悉燬於火文祥莅政凡官廨吏舍壇  
墀學校靡不修舉陞杭州府通判

凌漢

萬歷紹興府志字斗南河南人以秀才授司經  
局正字出知會稽寬簡仁恕愛民如子以註誤

繫按察司獄太祖知  
漢無罪釋之拜御史

謹按會稽縣志謂漢病卒  
會稽今據嘉靖通志正之

王谷器

明一統志徽州人洪武間蕭山知縣涖  
政明敏長於治才果決如流事無壅滯

陳公達

嘉靖餘姚縣志清江人為餘姚令時民籍新  
附狡黠者重輕其籍役法病不均公達令各

詣縣自實而使里甲羣証之皆悉其情偽乃次為  
上中下戶效元劉輝造鼠尾冊次第書之亦定役  
為三等如戶遇有差役視  
冊等差與之無不稱平者



賈驥

明一統志洪武間為新昌知縣廉謹自守九載滿去民擁道涕泣挽留不已

張真

於越新編蘇州人洪武末知諸暨厚重廉介時兵民稍營聚而土瘠賦重皆棄不耕元知

翼力請蠲賦乃佃墾至是欲履畝升科百姓憂懼真持不可以身為請乃得減額

李慶

於越新編順義人洪武末以國子生署右僉都授刑部員外知紹興威信並濟庭無滯獄暇即

躬理園蔬以供朝夕照磨侯鑰守職清貧每分俸資給由是幕僚競厲擢右都御史

袁時億

諸暨縣志東安人洪武末為諸暨學教諭深經術善文章誘進諸生未嘗辭倦時官聯法

峻人以田里為安不肯就學求仕宦及時億至聞有師模乃多從之遊時億著忠臣孝子輔相守令

等篇與子

弟論說

欽定四庫全書

卷一百五十三

譚應奎

舊浙江通志廣東人洪武末知山陰有治劇才摘發奸蠹吏民不敢欺

蕭九萬

嘉靖浙江通志南昌人洪武歲貢為諸暨縣丞嘗書容忍思慮四字疏其義揭門屏間百

姓以訟至者必諄諄以是誨之

唐復

嘉靖浙江通志字復亨武進人庚戌進士知餘姚為人直方斷擊無滯拊循懦弱甚著惠愛仕

終平樂知府

孫貞

獻徵錄字宗正南昌豐城人中癸酉鄉試甲辰登副榜者百六十餘人詔三等銓之貞得教授

紹興振教規務行公正有施御史者按郡甚嚴私於給事徐氏子既令充增廣生又升而廩膳之貞諍不可御史氣沮郡官皆從傍私語使姑許之退可改行勿與面質貞曰君子與人以信焉有今日

許之而明日可改御史知不可奪遂止作育諸生旦夕講解不倦秩滿陞國子助教轉博士

**都昶**

嘉靖餘姚縣志字文達海豐人以太學生知餘姚縣勤敏好禮士數過高士張一民所執禮甚

恭張具青菜糲飯昶飲食之極惟治縣得體百姓親附之永樂初營建追督材需者旁午姚恃昶無擾終九年任去吏胥莫能鈎致一錢然亦不笞辱吏以故吏無怨焉頻行民爭留其靴於舜江亭有

見靴泣下者

**熊禮**

於越新編臨川人永樂初知諸暨詳於治體使者抵金澗山取金民皆閤擾禮與府判董瑛極

言山本無金前時淘采無獲不可復啟禍增使者按視得實事遂寢

**鄭汝敬**

獻徵錄字行簡以字行居歙西永樂乙未進士知上虞先是令以貪冗去民素知行簡名

皆踴躍歡逐載道行簡至押豪右勸農桑賑饑窮  
治與梁棧道而大興學官居二年邑大治監察御  
史尹崇考浙七十二縣令置行簡亦悉心民隱不遺餘  
疑訟不決者多付理之行簡亦悉心民隱不遺餘  
力然同僚猜忌日甚先是邑有耆儒曰柳南仲賢  
而有文行簡敬之憫其貧贈以綿絮南仲狷介不  
受以錢百文索詩為謝行簡辭錢受詩同僚以是  
誣之將左遷行簡以母年高無以為養遂自解職  
歸上虞人請留不  
得相與擁泣而去

朱彤

紹興府志 鄞州人永樂初為紹興通判廉公有  
威人不敢干以私及去官士民走送者闐溢郊

外父老來自山谷  
皆歎歔流涕而別

岑子原

紹興府志 南海人永樂初為錢清北壩官廉  
介勤敏役夫餽酒肉悉却之敝袍蔬食處之

怡然政暇必兀坐讀書人謂子  
原卑官而清操獨立為可異云

王耕

山陰縣志字舜耕山東單縣人永樂中知山陰  
縣有經濟大畧時營造殷繁遠衛勾攝旗校絡

繹旁午供應調發民且不堪耕經理節約不廢法  
亦不病民內官鄭和下西洋索寶玉道所經輒縱  
恣直入人戶室廬探囊發篋遠近騷動耕言邑  
小民貧土產布粟而已寶玉非所出也和遂去

吳亨

於越新編字通夫鄞城人永樂中知諸暨清介  
方嚴悉心撫字縣湖田堤壞頻年苦潦亨疏請

築堤過防堅固水不能齧民享其利尋以目青免  
官貧不能歸遂寓安俗鄉卒而葬焉民率錢表其  
墓曰清廉縣  
令吳公墓

譚思敬

嵎縣志湖廣人由鄉舉永樂間任嵎令政先  
教化時以孝弟格言告諸父老使歸訓其子

弟邑民景從日誦所訓曰教我孝者譚乎因呼為孝譚九年滿秩民奏留復任九年民不忍舍遂家

於禮義鄉子

孫世為剡人

胡敏

舊浙江通志荊州人宣德中守紹興方正廉簡時庶務繁劇敏處置得宜民不擾而郡治

羅以禮

於越新編桂陽人宣德中守紹興寬猛得宜利弊無不興革好敦禮隱逸在任九年或雨

暘不時祈禱輒應民歌曰太守羅以禮存心合天理祈晴即得晴祈雨復得雨

錢浩

弘治紹興府志華亭人宣德間為山陰知縣政尚廉慎抑豪強伸枉滯邑人有需其子於鄰邑

而誣富室殺之者浩訪得之為白其事片言折獄民莫能欺

蘇琳

蕭山縣志山東蒙陰人正統間由進士為御史出知蕭山縣產櫻桃歲入貢後遣中官摘取多

索常例琳抗不與中官故不時採之使易壞欲以  
罪琳琳遂與中官相格建械至京英宗問曰爾何  
以格我內官對曰朝廷以口腹戕民內官以威勢  
虐朝廷命吏臣是以抗之英宗歎曰直臣也令還  
職琳曰但使櫻桃復貢蕭民死過  
半矣自是蕭邑得免貢櫻之害

徐士淵

嵎縣志定遠人由鄉舉正統間知嵎時值旱  
蝗力請得米八百石以賑已而游饑憂惶成

疾卒於官無以為殮先二年有令徐雍毘陵人潔  
己愛民問民疾苦憂勞邁疾子彥華刲股以救勿  
愈卒百姓  
先後哀之

張鉞

於越新編河南新安人正統末知諸暨縣訟清  
徭省飭學宮易浮橋凡所建置皆遠猷大利會

枯蒼盜起轉逼壓境而暨東南鄙有大山當發越  
界居民葉氏盤據其間素不奉法將應盜鉞潛率

義士夜搗其巢羣醜奔散  
盜不敢復窺縣賴以安

**袁通**

舊浙江通志正統中為紹興推官值處州賊葉宗留之亂通奉檄率鄉兵往討即日與其子就

道徑抵賊巢列柵以扼其衝賊夜劫其營父子奮鬪俱被害

**彭誼**

於越新編東莞人為御史累遷右僉都天順初以忤權貴調知紹興民苦饑即發倉賑之吏白當上請誼曰待請而發死者多矣吾何愛一官不活萬命耶明年有秋民爭輸實倉湖田正稅既重復加折耗鬻產不能償誼請按畝起耗不分輕重槩以三升為率民始獲蘇又築白馬閘障鹵水使不得入一郡蒙利最聞擢

山東布政晉副都御史

**周鐸**

弘治紹興府志大竹人景泰初知山陰縣外剛內恕豪強痛繩以法民相戒不敢犯尤留意學



政邑以稱治  
秩滿陞知州

蔣誼  
萬歷紹興府志字宗誼句容人成化間推官好文學引接儒生歟決平恕人無號寃者召拜御史

李鞏

蕭山縣志武陟人成化間由舉人任蕭邑會風潮突新林塘田廬漂沒鞏撫存患家收掩漂骸力請藩臬貸鄰郡儲粟以賑之補築隄岸不遑寢食尋以才能知紹興

胡瀛

於越新編羅山人成化中知餘姚時日本入貢所至騷動瀛多市瓦器實魚菜糧糧至即人與數器吏得飽輒就道歲饑發廩以賑之全活甚衆奏免田租之半復請折不免者監儲督折銀急甚瀛弗徵坐奪俸又弗徵其明年有秋民爭輸恐後無一逋者平徭息訟每誅豪右人皆畏悅以憂去

百姓  
思之

洪楷

洪珠

萬歷紹興府志字學庸莆田人初為御史出知紹興倫勤廉慎賦寬刑平成化

辛卯歲饑瀕海多盜楷令防守要隘盜遂屏息復勸富家出粟以貸貧弱由是歲不為害從子珠字玉方嘉靖初復知紹興建忠臣劉幹先賢尹焞祠封耆儒羅頤墓表節孝聘遺逸若王埜王琥輩皆躬造其廬一時士氣大振尋遷本省右叅政人謂大洪小洪先後同風

黃璧

萬歷紹興府志字廷玉浮梁人成化間同知紹興守潔政平秩滿去郡惟圖書衣被而已

張齡

萬歷紹興府志字延壽華州人成化中通判紹興廉靖謙和愛民下士勤勞致疾卒於官

劉規

舊浙江通志四川人成化中知餘姚凡所推行務當羣情監司或阻其事規持之勿變時中官

暴橫視獨挺身當之海溢大饑力請蠲賑尋以憂去後有賈宗錫張弘直者相繼與親並稱

金爵

山陰縣志字良貴綿州人成化中知山陰縣平易守法節賦省刑民愛之如父母時郡多虎獨

不入境人以為德化所感擢太僕丞仕至刑部尚書

許岳英

嵎縣志字邦賢潮陽人由鄉舉成化中知嵎縣當春出郊視農事民為建勸農亭舉行藍

田呂氏鄉約崇獎節孝率諸生習射於射圃開社學教閭子弟建廟學齋廡及豆籩壘爵等一切省視修飭闕田土舊多詭冒賦役不均特為丈田均賦宿弊一洗

朱棣

萬歷紹興府志字良用崑山人成化末知蕭山縣為政切於愛民催科不擾開濬湘湖豪強屏

迹立丁田法頒行諸郡邑利澤甚溥徵拜御史

臧鳳

劉玉臧鳳傳字瑞周曲阜人庚戌進士壬子選知嶧縣嶧齒繁而賦殷鳳勸農桑興學校又鑿

石甃堤百八十丈以障水衛民甚便之徵拜御史歷陞南京刑部尚書

陳堯弼

萬歷紹興府志字秉均大理人弘治初知會稽務興利除弊尤注意學校為闢地置田時

中貴出鎮者張甚堯弼遇之無加禮斂跡而去

劉麟

湯斌劉麟傳字元瑞南京廣洋衛人弘治九年進士歷郎中出知紹興府時劉瑾擅權士大夫

遷除者必候謁而後敢受任麟獨不往拜命即行淮郡政號廉平而瑾銜之甫五月撫細故罷為民士民醵金為贖麟曰昔劉寵一錢茲何多金也麾之去瑾誅起陝西叅政進副都御史以工部尚書

仕致

姚隆

獻徵錄字原學家金陵弘治壬戌進士令新昌時歲旱民多流殍設法賑濟多所全活數辨冤

獄有懷金謝者力拒之不受陞禮部主事轉郎中出守荊州

潘珍

分省人物考字玉卿婺源人弘治壬戌進士授諸暨知縣政務循良不事苛矯創建預備倉更

拓養濟院新孔子廟程力計工民不知勞陞大理寺右評事歷南京兵部右侍郎致仕

陳祥

於越新編高安人弘治中知上虞臨政嚴明人莫敢干以私歲饑按口施賑復請於朝得內帑

金以繼之仍蠲秋糧十之七他邑流徙者為煮粥僧寺以食之遠近全活者甚衆又嘗刻鄉約與民更始遇諸生有恩禮咸懷感奮期年以憂去

戴琥

於越新編浮梁人由御史知紹興持身廉介馭八邑令長每甄別其黑白稍有過輒庭叱之諸

令凜凜無敢犯服則舉鄉射禮名士間至梅山造  
隱士羅頌之廬召諸長老共揚推今古即窮鄉單  
戶有奇節獨行者封墓式閭遇民疾疫必遣醫分  
療文廟樂久廢特崇修之朔望進諸生講論經史  
尤究心水利若夏蓋湖西小江疏防得宜  
扁拖玉山築塘建閘蓄洩有候功利甚溥

李良

舊浙江通志山東人弘治中知山陰才畧過人  
廢隆畢舉運河土塘坍塌水溢害稼良斃以石

五十餘里  
田不為患

唐變

新昌縣志字希昭廣西全州人弘治庚戌進士  
知新昌縣性資明敏折獄曲盡隱衷時以神君

稱之泚事二三月庭無留牘隸卒皆令業履門不  
設禁有事得徑入自白省事節費奸弊肅清吏胥  
困饑多辭去民呼唐青天未幾更調東陽民涕泣  
送出境留像譙樓以志思後邑訟有無理者或往

彼求決焉  
官至知府

劉希賢

嘉靖餘姚縣志宣城人弘治十五年由吏員授餘姚主簿不以家累自隨性狷介遇事顧

義當否恥隨俗俯仰卒之日同僚檢其篋止俸餘五錢帕二方而已縣為殮其喪歸之

南大吉

獻徵錄字元善正德辛未進士歷紹興知府政修廢舉建嵇山書院革屬邑髦士教之成

者什九囚多不決者一鞠即得其情屬吏有被誣者特為洗雪盡力陂塘備旱澇運河為勢家所侵疏而復之郡有大盜數為權要所庇悉置之法有學士侵王右軍謝太傅故地悉割歸其主竟由是歸罷

吳成器

王鴻緒任環傳成器休寧人為會稽典史倭三百餘劫會稽為官軍所逐走登龕山成器

遮擊盡殲之又破賊曹娥江擢浙江布政司經歷旋擢紹興通判與賊大小數十戰皆捷身先士卒進止有方畧所部無秋毫犯士民率於其戰處立祠祀之後改武秩

毛伯溫

於越新編吉水人正德中任紹興府推官每獄必兀然凝坐徐察言色務得其隱哀而

能斷無縱無枉諸郡邑有訟寃者必求直於伯溫攝理盈案能譽大起尤好敦禮士夫學行有聞必造門咨訪拜御史厯兵部尚書進太子太保

汪度

於越新編績溪人以鄉貢知上虞自奉過儉衣至十綈不易朝夕惟豆羹一盂而事母則極豐

閩

有賣犢以償其俸者廉知之命歸贖其犢或有

閩

必以理諭再三未嘗輒加鞭撻民亦不忍欺

正德間劉瑾誣以受賄落職室如懸磬民爭助不許去之日士民擁留不獲為樹碑頌德



張煥

山陰縣志字主奎泰和人正德間以進士知山陰平恕近民裁政務先大體丁卯秋海溢漂溺

廬舍煥躬自巡省弔死問生請寬租賦以賑之比歲登令民築塘捍海復於上流建扁拖閘以時蓄

洩自是無水患留心學校邑故有嵇山書院煥復修之

顧鐸

萬厯紹興府志字孔振博興人正德間以進士知山陰嚴明威斷吏不敢為奸豪右敘跡

張讚

嘉靖餘姚縣志字宗器六合人由鄉貢知餘姚正德壬申秋海溢溺民浮屍蔽江涕泣躬督瘞

之時邑里蕭條民免於溺者皆饑寒不免讚力請賑之而當路猶督租如故讚俟其行縣檢荒率饑

民路號請貸當路盛氣加讚讚應對如響租終獲免民賴全活

甯欽

諸暨縣志字宗堯衡陽人正德間以舉人署諸暨學諭士有不能婚喪者輟月俸為助先是諸

生有持學事短長者欽至繩東之莫敢犯俗婚喪多不以禮欽為繪六禮圖疏附儀注陳肆學宮令衆觀覽且有精鑒諸生中凡許可者無不向進六年召為監察御史

**邱養浩**

於越新編晉江人正德中知餘姚才識明敏視義勇為旌善良抑豪橫民皆知所勸戒時

姚賦役多奸欺養浩洞見弊源乃定為橫縱冊釐正之最稱均平擢御史去

**張暄**

嵎縣志由鄉舉正德間任嵎縣清操凜凜時謂之張強項中官橫肆使者下邑誅求莫敢誰何

暄立筭其使中官識暄名置不問上官以所不便檄令諸邑暄獨封還或反論駁見者吐舌暄不為

意上官亦嚴憚之

**顧存仁**

嘉靖餘姚縣志字伯剛太倉人以進士除知餘姚姚賦役自邱令釐正豪猾復為奸欺飛

詭漏免貧民一丁有出銀九錢以上者存仁乃罷  
丁科田每歲畝出銀六釐於是無田者得以無擾  
富者無能資緣民皆稱平監司推其法於全浙又  
病姚無邑志謀纂述之未就尋遷給事中去丞金  
韶嗣成之

應佐

山陰縣志江都人少以志節聞其鄉有妖為辨  
怪佐禱於神妖遂息貢入太學丞山陰清而有

執以文學飭吏  
治遷高陽知縣

朱廷立

諸暨縣志字子禮通山人嘉靖初知諸暨縣  
先是縣有額外長短差歲費民財八百餘兩

廷立為蠲除之山會二縣有海隄之役議者令暨  
亦歲出夫錢廷立曰居民守土各有分域禦災捍  
患從其封疆山會之隄而暨與修之暨亦歲有湖  
隄之役可率山會之民從事乎作訟誠勒諸石諭

民無相告許置鼓於獄囚繫有所苦令  
擊以聞後遷監察御史官至禮部侍郎

湯紹恩

毛奇齡循吏傳字汝承安岳人嘉靖五年進士十四年以郎中出知紹興山陰東南有浦

陽江為三江之一上接金華浦江諸水北流至諸  
暨與東江合北過峽山東匯山陰之麻溪然後盡  
注錢清江而入於海是時浦陽已通浙第口隘浙  
常高水反入浦陽而灌麻溪其錢清之入海者勢  
若建瓴又傾濊不可止所以既苦潦又苦膜紹恩  
至相浦陽上流恢前守戴琥所開績堰使浦陽之  
通浙者坦而易洩乃塞麻溪以遏其來不使浦陽  
之水得復入山陰東南於是相其尾閭凡在紹諸  
水濫則易浙濊則易竭者為水坊海濱以伺潮瀉  
而定啟閉初錢清江下流原有二閘歲久堙廢紹  
恩相下流三江之口其地夾兩山為浦陽入海故  
道下有石峽橫亘數十丈泗水得之乃伐石於山

依峽建閘石牝牡相銜烹秣和炭以膠之石之激  
水者刻其首使不得與水爭下有檻而上有樑施  
橫坊其中刻平水之則於柱石間而啟閉之兩隄  
築土治鐵而澆其根凡二十八閘應二十八宿隄  
數百丈而大閘之內又置備閘數重曰經漚曰撞  
塘曰平水閘一年工成共得良田百萬畝漁鹽斥  
鹵桑竹場暇亦不下八十萬畝初紹恩築隄潰  
有豚魚千頭乘潮而上衆驚告紹恩曰此隄成之  
兆也在易之中孚豚魚吉利涉大川立令入水築  
人多怨讟又其時潮大至見者洶洶紹恩不顧禱  
於海潮忽下望隄而却後  
以次遷去歷官布政使

佟應龍

萬歷紹興府志淮安人嘉靖初知新昌縣病  
賦役不均下車詢知其狀亟為平曷里汰冗

濫矯偏救弊意在佐貧弱抑富強有請托  
者初不峻拒而臨事一斷以理士民德之

施堯臣

蕭山縣志字欽甫青陽人嘉靖中以進士知蕭山蕭山蕭自建邑以來無城屢經海寇始議築

城竟莫能就堯臣至力請築城相地鳩工聚石晝夜督率不數月而成堅厚周緻屹然一方保障滋任不挈家屬止攜一簣及遷惟贈言數紙而已官至順天府尹

王聘

萬歷紹興府志字念覺利津人嘉靖中以給事中謫知蕭山馭吏撫民威惠並著尤究心水利

纂修  
圖志

吳三畏

嵎縣志字日寅莆田人由鄉舉嘉靖間以臨海學諭陞嵎令時海寇猖獗三畏覩邑無城

曰不城是以其民棄也周遭相度則城故有址多屋於民令撤去即懟怨不避計費當巨萬緡役當數萬衆或有難色進之曰城勞民不城無民則奚擇乃翕然惟命三畏晝夜省督數月賊自天台突

入境相望五里三畏曰城即半猶愈於無城率民兵上半城燎火燭天呼噪動地賊知備乃宵遁明年城成賊復至三畏乘城守禦賊不敢近陞廣信府同知

劉曷

山陰縣志字晉初鳳陽人嘉靖間以進士知山陰性穎敏剖決無滯牒邑瀕海漲沙千頃民因

為田歲有獲而無徵額曷躬親履畝而以無抵糧稅量均於內民甚便之視事三年職務盡舉公庭閤如遷刑部主事

陳宗慶

嵎縣志金谿人由鄉舉嘉靖間為嵎縣令至邑勞問民瘼上書論列兩事其一謂嵎民協

濟東關重役不均累苦萬狀竊計曹娥東關兩驛隔一衣帶水耳誠得併一費減十四五其一謂嵎例食台鹽乃里道險阻經年鹽不一至而私鹽禁且厲是使民率不得食鹽也挑會鹽場與嵎接壤

宜以彼鹽令商人告稅載發抵嶮使窮民得以商鹽展轉貿易官民兩便書上皆不報改官去去十年兩驛併又十年商鹽通其言大驗民益思之

**張鑑**

萬厯會稽縣志字汝明南充人嘉靖進士知會稽時縣中匿稅與畝以萬計賠者苦之鑑請履畝一稅經歲寢食田畝中迨訖事民大稱便商旅苦濫榷鑑請裁冗署凡五所政寬不妄撻一人任滿去服御蕭然

歷官都御史

**黃綰**

萬厯紹興府志字子賢汝南人以刑部郎遷知紹興府簡靜寬大刑清政理士民愛戴始綰居

部時按問給事中陳洸罪後洸依附權相遂逮綰詣詔獄郡人無少長攀號塞道車不得前

**陳讓**

於越新編晉江人進士為紹興推官獻欵明恕凡郡中大利病贊太守行之尤以正風俗明教



化為已任毀淫祠獎節孝增置學田崇祀先哲蓋斌斌以文學飭吏治拜御史

**鄭芸**

獻徵錄字士馨莆田人嘉靖乙未進士知松陽縣精敏有聲部使者疏其才移上虞首濬沙河

通商舶甦郵傳復上妃白馬夏蓋三湖即以湖歲入魚蝦錢倡築上虞城後十五年倭寇浙東獨上虞以有城免鋒鏑遷監察御史

**陳懋觀**

紹興府志字孔質長樂人初知會稽政聲流布憂去除補山陰蔬食布袍淡若寒士順民

好惡賦緩訟簡嘉靖中循吏以懋觀為最

**曹天憲**

於越新編浮梁人嘉靖中知新昌性剛直時縣官公出必攜苞苴廣為餽遺及祭祀宴飲

務極侈靡天憲一切罷省之不攜家累延諸生至寢室蔬食相對如寒士著賦役成規勒之石縣阻

山民苦夫役為言當路悉從裁損一監司過首問  
沃洲天姥憲對曰山不在高有仙則名今仙去矣  
止荒山耳歲大旱布袍芒履行禱烈日中出舍僧  
寺望見枯槁即泣然淚下至欲自焚以謝百姓已  
而雨決歲登  
官四川參議

宋賢

新昌縣志字及甫華亭人嘉靖進士知新昌縣  
繼曹天憲為政守其畫一而精密過之庭無滯

獄人服其明邑田畝多坍荒或抱空稅奸巧者或  
饗無糧之田賢履畝度田上下山阪躬較量之編  
為經緯二冊以便稽閱一時弊  
盡賦均民以曹宋並稱擢御史

曹祥

王世貞曹祥墓誌字世奇太倉人領鄉薦為新  
昌令洞坦不設鉤距諸來訟者取片語而決間

撫一二訟師斥之境外是時民貧苦嫁多弗舉女  
祥乃為嫁程若嫁厚者取婦而責裝奩者及棄女

者以次受法欲築長堤捍溪水親行隄所吏民無弗從者同土告衆曰視吾力所

任而準辰刻至酉而罷亦視吾出入為準不易月而隄成為令九載其俗一變比滿當代邑人之有女者以千數攜而送且指謂女曰此而父也母卒終喪遂不復仕

**萬鵬**

於越新編武進人嘉靖中知松陽縣改新昌明習吏治常曰吾訓士惟一經治民惟一律耳時

倭寇自天台突至邑舊無城民皆倉皇奔去鵬乃決議築城度方廣量丁土聚石鳩工使分築之日視其勤惰而賞罰之民爭効力踰年而成以勞瘁卒於官

**李邦義**

萬厯上虞縣志字宜之連州人嘉靖中以進士知上虞時督撫禦倭海上大兵往來邦義

委曲籌應民賴以安為政嚴明而不傷苛察待士有禮處民事如家事務不拂其好惡拜給事中

沈啓

王世貞沈啓傳字子由吳江人嘉靖進士為紹興守所屬會稽新昌蕭山田與賦左累其長至

賄產以償啓平其額而散之里俾輕而易完人人稱便郡田於山多苦旱室廬櫛比苦火又濱海魃為虎啓禱於神虎復為魃渡海去

李僑

於越新編長清人嘉靖間倭寇擾越僑為武選郎有聲遂簡知紹興府既至務為持重令丁壯

歸田郊市晏如賊亦不敢犯督府方用兵征求四出僑每持議節省又欲發會稽銀礦僑堅執不可督府甚怒而事竟寢為政精嚴吏屏氣不敢玩越俗競尚淫靡有犯必繩即請託弗貸時山陰李令每出則以兩鐵索前導僑出必懸兩爐藝香越人語曰府香爐縣鐵索一為善一為惡在郡六年遷按察副使終山西左布政

楊行中

山陰縣志字惟慎嘉靖間以進士知山陰厚重寬大脫畧苛細雖禁劇中不越常度寬猛

相濟士民懼

洽擢御史

許如蘭

舊浙江通志廬州合肥人以工部郎出守紹興三江自湯守建開久漸圯捐俸修築一還

舊制海塘闔繫三縣田禾區畫永久疏通之法越民賴之擢密雲兵備道

毛壽南

山陰縣志吳江人由進士授山陰令值歲歉道殣相望壽南請蠲不得則停征兩限監司

讓之勿顧仍捐廩祿賑濟餓者得糜病者得藥時有乘災謀為亂者廉得渠魁捕治之餘黨悉散先是吏胥媚攝篆詭報完賦以為功會赦撫院據完額索賦壽南具實以報卒罷徵越俗多以殺人相誣一訊家輒破乃先驗屍然後訊遂使誣者懾息民艱於漕則為權豐歉議改折邑有麻溪壩壩外

欽定四庫全書

卷一百五十三

為天樂鄉田三萬七千有奇江潮衝溢乃築堤於  
猶山鄭家山之間以捍外潮民爭赴工不費一緡

而事竣治縣  
五載拜御史

林森

萬歷紹興府志候官人嘉靖末知嵎奉母孝嘗  
曰吾何以慰母惟當為好官耳舊有糧長常例

金森至首革之即修衙公費亦不受每恤困窮抑  
豪右定畝均役吏胥束手調象山行李蕭然里老  
醵金為贖  
卒不受

蔣正元

新昌縣志廣西灌陽人由歲貢授新昌令民  
稱為蔣父創立義倉三十間積穀以賑荒巾

除斗級之害陞藩府長史  
值寇亂以身蔽藩遂遇害

許效賢

萬歷紹興府志字子官莆田人嘉靖中為新  
昌訓導誦說仁義論難經旨署縣事以贖金

置學田  
若干畝

朱一柏

嵎縣志寧國人弱冠舉於鄉隆慶五年除知嵎縣始至人疑無治幹甫月有胥玩法懲之

一老胥抱牘陳事微言欲中以利又懲之人大信服兩造設平心而聽往往諭其自解後訟日簡堂下肅然嵎士三十年無舉於鄉者諸父老言往時溪流環邑若抱今南徙風氣用漓然故道可濬即民灌漑亦利賴一柏曰苟利士民吾其任焉不數月河成集羣士子於學宮厚其餼廩月凡三試皆身臨之終歲無惰容是科舉者三人陞南京光祿署正歷慶遠知府

朱芥

舊浙江通志富順人以刑部郎出守紹興始下車周咨民隱清課額崇學校省刑出滯不數月

士民  
頌之

田瑄

新昌縣志字希玉大田人辛未進士萬曆二年任新昌俗以人命誣訐每至破產瑄痛懲數輩

由是惜命保家鄉苦盜瑄每鄉廉真盜一人立為總甲凡盜發令其捕緝盜風頓息歲旱徒跣禱赤日中開歲乃大稔一日行野見田有渠無水問故民曰修渠則屬民而得水則屬勢家我何徒苦為瑄曰有是哉乃舍郊外督民濬築且為履畝均放之自是豪強不得復專編氓咸被其澤負郭田一萬三千餘畝悉成膏腴民每候其出爭為舉輿歡聲溢田野間作分水亭以總之瑄慮歲久法湮捐俸置田為每歲濬渠之費纂修縣志序論記跋俱出其手陞戶部主事

徐貞明

山陰縣志字伯繼貴溪人以進士授山陰令在任五載抑豪強扶善良緩科勸農以至葺

官路築海塘不取行鋪不差公勾不畏勢閥不避上官舉士之公正者為民導善止惡及內召民泣



送輿馬擁  
不能行

劉會

舊浙江通志惠安人知蕭山建  
西興石塘及龍口閘為民永賴

施三捷

嵎縣志字長孺福清人由舉人知嵎縣強毅  
有為尤精於律諸讞決手自填註吏書無敢

亂法待士有禮尤重行誼有私謁者謝不受即豪  
右相戒無犯上官皆敬憚之建南橋邑人名以施  
恩陞順天府推官

陳允堅

諸暨縣志號毅軒長洲人萬厯進士授諸暨  
令治尚愷悌勸民息訟調繁石門士民攀轅

者百餘里歲時  
走石門謁之

秦尚明

舊浙江通志太康人蕭山令廉明並著減賦  
額却例金於署門外立榜亭置爨器民有以

訟牒至者即令居此  
攝被訟至立為斷遣

劉光復

諸暨縣志號貞一青陽人萬厯戊戌進士任  
諸暨縣暨介萬山間而七十二湖處於下流

山田易旱湖田易澇民常患之光復相度地勢壩  
麻溪導七堰旱澇有備且於諸湖中畫為經界築  
長圩以捍水沿江起大堤開水門以時啟閉立圩  
長數十丈圩之坍塌令督領培補浣江出縣界地  
勢犬牙水至此盤渦不瀉上游潰溢光復欲直其  
江以地屬蕭山率民夫數百人一夕開通謂之新  
江水患大減置義田數百畝貯租備賑立義塚百  
餘處掩骼埋胔停喪溺女銅婢及同族為僕之弊  
相沿不已光  
復悉革除之

胡思仲

紹興府志績溪人萬厯進士今上虞利弊纖  
細罔不周知下車即清丈田土息民爭訟又

捐俸多置學田修築新安  
巽水二閘合邑利賴焉

董羽宸

舊浙江通志華亭人萬厯間知餘姚時當倭患奸民與市以致闖入羽宸廉得其人按以

法海患始息時鄉豪有殺其族屬箱里勿聞者羽宸偵知立出其骸於荆棘中民服如神明

徐待聘

上虞縣志常熟人萬厯進士自樂清調繁上虞雅好文學惠民息競覈漳汀湖侵佔清玉

帶溪壅淤度西溪湖地形又廣置義塚政餘課士不倦秩滿陞刑部主事

王應朝

嵎縣志字我辰六安州人萬厯中由鄉舉知嵎立意釐剔姦猾屏跡而不事繁刑堂清如

水調繁  
桐鄉

陳如松

舊浙江通志同安人知蕭山以邑水東去不利民財乃築壩截其流別開雙河塍使水折

而南注遶出大通橋又北注以遶於舊道凡為橋者三建塢二後陞知州去

馬如蛟

舊浙江通志字騰仲和州人天啟中令山陰口吃而斷決如流嘗治海塘修麻溪壩定閘

規蓄洩又建義倉立大善社每訊盜賊毋許妄攀善政不一行取陞御史

孫蘭

毛奇齡循吏傳字曉仲無錫人崇禎進士知紹興府會歲饑蘭定賑救法預為分區使鄉官分

主之籍記饑民之受賑者合萬九千六百零口立廠二百七十六所設散米給錢粥廠移粥藥局病坊官糶民糶官積民積諸事共二十六則浙東三府十九縣皆行其法所全活以千萬計御史祁彪佳著為救荒全書一十八卷可歲行之如官積先關廩於秋收時征米每畝征升以時直給契登廩次年官出如舊直民積計民田積米凡三十以上畝積五升六十以上畝積七升百畝以上積斗三

百以上遞增而米藏其家不俟官驗明年計畝以時直糶米於本邑其法如此陞廣東按察司副使

**袁定**

舊浙江通志華亭人崇禎間知餘姚歲饑貧民聚衆肆掠捕得數人未及報即搥殺之而自刎

不職隨設法賑濟多所全活

**余賜**

舊浙江通志莆田人崇禎間令上虞土賊竊發猝入城賜勒鄉勇巷戰格退之所擒獲即斃之

杖下及得賊籍勿展視燭其籍一時良莠無不感泣

**蕭琦**

諸暨縣志號韓若吉水人崇禎甲戌進士知諸暨縣暨民健訟琦片言折服庭無留牘癸未冬

東陽人許都倡亂時承平日久人不知兵數百里內外無不震駭奔竄琦閉城靜鎮人情始安

**李拯**

舊浙江通志晉江人崇禎間令上虞所按訟牒明是非而止罕及刑楚紳士或餽以修脯辭勿

納布袍蔬食宴如也夜則篝燈讀書喜與士論文  
所獎拔皆譽髦出清俸以修學校不借民工不資

贖錢陞工

部主事

陳子龍

諸暨縣志號臥子松江華亭人崇禎丁丑進士為紹興司李署諸暨篆時歲大饑奸民誘

聚亡命肆以剽掠子龍以計擒之民賴以安

王正中

舊浙江通志比直人崇禎間知餘姚時山寇竊發邑如沸塘正中彈壓有方民依為命

錢世貴

諸暨縣志字聖需江南青浦人崇禎庚辰進士涖暨二載值歲大疫死亡相枕藉世貴設

法賑濟民賴以生縣治堂署廊廡傾圮庀材鼎新釐正民間權量至今畫一

梁佳植

餘姚縣志字南有宜春人崇禎進士令餘姚體緩弱未嘗形喜怒人莫窺其際及鞠訟則

屹然不可移姚邑錢穀久為吏胥乾沒解戶苦之  
佳植一洗積弊民輸將恐後淮任四載與民休息  
盜賊鮮少去官時  
涕泣送者無算

王章

邵長蘅三忠傳字漢臣武進人崇禎進士初令  
諸暨調繁改鄞鄞人來迎暨人逐之曰王君我  
父也鄞何與鄞人爭之曰王君我父也暨安得留  
章兩慰遣之乘夜啟門壯去治鄞如暨兩邑皆肖  
像以祠擢御史殉甲申難

國朝賜諡節愍

國朝

劉方至

舊浙江通志山東人順治三年以貢生授紹  
興推官寬和慈惠淮任甫一載政清刑簡視  
上虞篆山賊王岳壽夜率衆攻城時守兵單弱城  
陷方至死之事

開贈按察司僉事廕

一子入監讀書

韓昌先

舊浙江通志遼東人順治九年知蕭山縣蒞事明敏立里甲均當法徭役均而詭寄之弊

絕至今遵  
行卒於官

張邦福

舊浙江通志湖廣蘄水人順治十八年以進士任紹興府推官精敏練達摘發如神有訟

者訴牒悉置內署勾攝罪犯惟姓名而已故訴者不知其訟訟者亦不知其訴胥吏不能為奸詰訊

之下情偽立  
辨人頌公明

賈國楨

紹興府志字蒼嶠山西曲沃人康熙五年由貢生任蕭山縣蕭密邇省會營兵往來畜牧

民甚苦之一曰盤債患在貧民一曰國賄患在愚民下此則馬廐入市有短價勒貨之患國楨潔已



執法前患悉除旁邑聞  
之質成踵至二載卒官

張三異

舊浙江通志漢陽人由進士康熙七年任紹興知府王嗣臯重修紹興府志序三異守郡

力舉廢墜民式於法耕夫牧豎咸知從士大夫後  
蒸蒸丕變焉陳可畏重修府學記郡庠祀三異捐  
俸重建若殿若廡若櫺星門若泮橋若名宦祠次  
第畢舉育才興行多士嚮風紹興府志入祀義愛  
祠

許弘勲

舊浙江通志遼東人康熙十三年知紹興府鎮靜有大度莅任甫一月閭逆竊發越屬暨

嵎新三邑奸民嘯聚圍攻郡城弘勲乘夜率兵出  
殲縛渠魁餘皆撫慰散遣之郡境得安陞寧紹道

歷河南  
布政使

高登先

山陰縣志字倩升湖廣鍾祥人順治己亥進士任山陰以誠信和易待民不尚苛察而人

不敢欺康熙十三年山賊竊發攻常禧二門城幾陷登先率民多方守禦援兵至賊始退十五年大兵勦闖過天樂橋登先供應軍需倉卒間溺於水衆救獲甦遂構石梁百姓以登先誠於為民遂名

曰高公橋尋擢

姚文熊

名官留祀冊江南桐城人康熙丁未進士十五年知蕭山秉性慈祥操守清潔凡訟於庭

者曲直立剖莫不心服而去尤振興文教優禮士類惠政循聲協於遐邇秩滿士民建祠於江寺之

左肖像焉

李鐸

紹興府志字天民奉天鐵嶺人以兵部郎出知紹興府性喜有為自郡署城垣社稷壇暨鐘樓

驛館書院賢祠一切陂塘古蹟期年振起康熙二十九年除姚大水漂溺民人廬墓以萬計其存者饑乏待斃鐸與知縣康如璉設粥廠數十哺之已又念就食妨業令各鄉坊上民籍每男婦一人給米四斗幼者半之復製木棉衣若干予寒者全活無算守越四載始終不名一錢三十一年調繁杭州民遮道蜂擁大哭鐸亦流涕而別

### 王風采

公舉事實字汝載黃岡人康熙己未進士二十八年令會稽清介自矢俗好訟以謙讓誨

化之嚴絕請托大嵐山連金寧溫台四郡界有號白頭賊者乘歲饑誘民為亂風采廉得其魁捕寘於法餘黨解散乃勸富民賑貸全活甚眾捐俸建造范陽閘土人利之在任十一年邑稱大治

### 毛上習

名宦留祀冊廣西賀縣人康熙二十九年由舉人知諸暨縣捐俸賑饑愛民如子徵糧有

法設立義學延師訓誨邑中寒士若坐春風在任三年疾卒奠送者塞道

卞之釗

名宦留祀冊正白旗人康熙四十七年由監生知諸暨縣持身廉謹每月遴選鄉耆宣講

聖諭寒暑不輟捐俸修學訓課生童築湖埂以禦水設戶單以徵糧建粥廠以賑饑聽保甲以弭盜善政不可枚舉

浙江通志卷一百五十三

欽定四庫全書

浙江通志卷一百五十四

名宦

九

台州府

晉

羊忻

台州府志永和三年初置樂安以蔭補邑令甫至以縣治地偏非一邑正氣乃遷於青圭前功

成而民不勞其治邑也以風流儒雅相尚而事無廢弛民戴之如慈父母焉

南北朝

臧熹

宋書臧質傳質父熹字義和東莞莒人武敬皇后弟也為建威將軍臨海太守郡經兵寇百不

存一熹綏緝綱紀招聚流散歸之者千餘家徵拜散騎常侍

阮長之

南史本傳字景茂一字善業陳留尉氏人元嘉十一年除臨海太守涖官有風績為後人

所思宋世言善政者咸稱之

傅昭

梁書本傳字茂遠北地靈州人晉司隸校尉咸七世孫天監十七年出為智武將軍臨海太守

郡有窰巖前後太守皆自封固專收其利昭以周文之圓與百姓共之大可喻小乃教勿封縣令常餉粟置絹於薄下昭笑而還之普通五年進散騎常侍金紫光祿大夫昭所涖官常以清靜為政不尚嚴肅大通二年卒諡曰貞

王筠

梁書本傳字元禮瑯邪臨沂人中大通三年為臨海太守舊浙江通志筠任臨海實力輯撫流

民歸者千餘家

劉潛

南史本傳字孝儀彭城人工屬文累遷尚書左丞長兼御史中丞出為臨海太守時政網疎闊

百姓多不遵禁孝儀下車宣示條制勵精綏撫境內翕然風俗大變入遷都官尚書

蕭洽

南史本傳字宏稱南蘭陵人善屬文仕梁累遷臨海太守為政清平不尚威猛人俗便之後拜

司徒左長史

劉穀

台州府志字仲美沛國人天監三年射策高第為寧海令有惠利及民

唐

來濟

赤城志為同中書門下高宗將以武氏為后濟諫曰立后以承宗廟宜擇禮義名家以副四海

之望帝怒移

台州刺史

袁光孚

台州府志天寶間為台州刺史沈佺期稱云大才沈毅雅度溫良又云甘雨隨傳於往還

仁風交扇於期月味其言可為良吏矣

鄭虔

唐書本傳鄭州滎陽人元宗愛其才為置廣文館以虔為博士後貶台州司戶參軍虔在官貧

約澹如也舊浙江通志虔至選民間子弟教之以身率先

徐裕

明一統志為台州刺史自台遷衢州劉禹錫贈詩云聞道天台有遺愛人將琪木比甘棠

李肇

台州府志大中七年為台州刺史政善民安所著有國史補翰林志經史釋題等書



李師望

赤城志大中十四年以刺史至州討賊戰於天台觀前收復唐興縣

陳仲通

台州府志咸通中為寧海令以德政稱裘甫寇浙東將萬餘人入奉化寧海仲通率兵迎

敵被害百  
姓哀之

五代

陳長官

失其名十國春秋事武肅王為寧海縣令會王命增州縣賦稅長官上書極諫王大怒逮

之獄長官以死爭之得免寧海故稱劇縣租稅視諸邑為獨輕者皆其力也至今猶廟祀焉

宋

畢士元

赤城志代州人以大理寺丞知台州時吳越入朝以善撫摩得譽奏言錢氏所上圖牒皆

張侈賦數不可信願一用舊籍以輯新民詔從之後改名士安景德中拜同中書門下平章事

王子興

臨海縣志字希孟密州人雍熙元年知臨海縣事精敏有才略以公事申請者文牒紛委

頃刻決遣曾無疑滯歲早禱於城隍輒應因新其廟宇而記之終右諫議大夫

章得象

赤城志泉州人大中祥符四年以屯田員外郎知台州簡重有實政寶元初以戶部尚書

同中書門下平章事諡文簡

辛若濟

赤城志天禧三年以衛尉寺丞通判台州引東北流瀑入城以濟民用人皆德之

季勾

赤城志慶歷五年知臨海縣掌西北隅城築有功

彭思永

赤城新志廬陵人慶歷五年以太常博士通判睦州時台大水敗城人多溺死檄思永往

攝治焉盡瘁死者為文以祭民  
貧不能葺居者伐木以助之

**黃瑛**

赤城志慶歷六年以太子中舍通判台州時遭大水瑛佐守元絳悉力贍卹民用以寧官至虞

郎部

**范仲溫**

范仲淹范伯玉墓誌字伯玉幽州人唐末家於蘇臺景祐二年以恩例補試將作監主簿

除越州新昌尉以誠接物民用知勸在邑三年盜不及境外計舉監杭州餘姚縣市征能寬其利商旅便之三載以績聞除寧海軍節度推官知台州黃巖縣慶歷七年海潮大至壞州城沒溺者甚衆仲溫教民為桴晝夜救之全活數千人上官請董衆以治城仲溫雅喜利人長於慮事衆議築土為城用甃以傳之仲溫謂人築且勞又捍水之衝甃何能久乃集民累土以牛數百蹂之堅而後表以

長石五相銜枕勢莫得動其城八門皆設之閘衆服其善歲飢州命邑官率富人出穀俾輕其價以助窮民而窮民乏貲無以得穀仲溫諭貸之衆皆悅從飢者獲濟黃巖大邑民數萬戶訟爭盈庭仲溫專尚仁愛多以理遣民自愛服秩滿遷太子中舍致仕

錢仲基

赤城志皇祐二年以國子博士通判台州時郡大水請發官廩且丐粟當路以濟民飢

石牧之

太平縣志皇祐五年任天台縣令興建學校振作人材綽有政聲見陳古靈學記

范世文

赤城志仲溫之子熙寧九年知黃巖縣鑿井開坊巷

鄭至道

明一統志元祐初知天台縣為政寬簡專務教化民心悅服後秩滿邑民攀留不忍其行

因留家松關至今有松關留鄭故事論民書七篇尚存

陳敏

嘉靖浙江通志無錫人知台州朝命立元祐黨籍碑敏不肯立監司促之急敏曰誣司馬公為

姦臣是誣天也倅立之敏碎其石或咎敏敏曰我死且不辭何劾之畏遂挂冠去

范祖述

宋史范百祿傳祖述知台州奏罷黃甘葛蕈之貢累官朝議大夫

張元仲

萬應黃巖縣志字孝友建安人元祐五年以承務郎知黃巖縣事建橋西浦渡民甚便之

呼孝友橋

呂全

赤城志元祐七年知臨海縣以政績聞時民役至七年始更全隨產高下為久近民便之

劉光

台州府志紹聖二年知仙居縣政務簡惠黎民懷之後遷本郡守人多焚香道迎墨吏望風解

綬去及代男女巷哭閉城使不得出

滕膺

赤城新志字子勤宣和中為台州戶曹參軍時睦寇方臘聲震東南守丞以下皆遁膺獨慨然

自任即日移書訣其父母昆弟而閉其妻子於官舍悉召州人諭以利害人人感泣思奮乃亟下令發兵守險增陴濬隍分屯列柵為死守計既而呂師囊亦起仙居為賊響應先後攻城凡數四膺皆應機設械立摧破之手弓臨城殪厥渠魁賊遂退走而城卒全慶元初州人上其功勅賜義靈廟至馬今祀

盧崇

赤城志宣和二年知天台縣呂師囊攻城與戶曹滕膺守禦有功

鄒柄

嘉靖浙江通志字德久晉陵人浩子弱冠從龜山先生游靖康初薦補承務郎除編修權給事

出守天台行其所學類多善政莊外敘中與人不苟合前後奏議論列天下偉之

陸案

台州府志字元珍無錫人靖康間以縣丞攝寧海令遇事立決老吏夙奸畏懾不敢動亟以淫

祠感民悉捕寘於法習俗為變會遷秩父老出境爭贖金帛案拒之歷杭州仁和縣尉越州司功曹

提舉京邑常平等事所至以治行稱

謝克家

赤城志上蔡人建炎二年以朝奉大夫龍圖閣待制知台州吏治精明人不敢犯後參知

政事以資政殿學士知衢州終於衢遺命葬黃巖縣靈石山子孫因家焉

黃子游

周必大黃子游墓誌字叔言系出浦城紹興元年入監左藏西庫時移蹕臨安子游銜命

先渡江經度臺省倉庫所寓畫圖以進後皆不易改知台州台產鹽鉅毗囊橐其中重法不能禁子游治以輕典人不忍犯久之求浙東安撫司參謀官以歸

楊煒

赤城志紹興十九年知黃巖縣開官私河用工一百七十餘萬立斗門九所民賴之嘗移書參

政李光詆丞相秦檜為豪民所訴付大理獄

崔縱

嘉靖浙江通志字元矩臨川人政和進士為仙居縣丞有惠政累遷承議郎二帝北行高宗將

遣使通問朝臣以前使者相繼受繫莫肯往縱毅然請行竟握節以死

李浩

宋史本傳字德遠其先居建昌遷臨川紹興十二年擢進士第孝宗即位除員外郎乞外得台

州州有練中禁軍五百人訓練官貪殘失衆心不逞者因謀作亂忽露刃於庭浩推其為首者四人黜徙之迄無事除直祕閣並海有宿寇久不獲浩募其徒自縛贖罪即得其魁豪民鄭憲以貨給事權貴人門囊索為奸事覺械繫之死獄中籍其家徙其妻孥權貴人教其家訟寃且誣浩以買妾事



言者擠之疏方上權參政劉洪奏曰李浩為郡獲罪豪民為其所誣臣考其本末甚白上顧曰守臣不畏強禦豈易得耶國章安在洪袖出之遂留中不下大理觀望猶欲還其所沒貲上批其後曰台州所斷甚允當鄭憲家貲永不給還流徙如故浩始得安除司農少卿

沈介

赤城志紹興二十七年以左朝散郎知台州為政有聲雨暘禱輒應

龔滂

萬厯黃巖縣志字清夫上饒人紹興二十八年以右從政郎知黃巖縣事有善政父老言紹興

時良令必稱滂云

韓元龍

台州府志字子雲真定人紹興二十五年任天台縣時邑賦入籍悉力區畫有疏豪猾未

稔謝不納曰一人入吾耳則不以善良待之矣聞者革心官至大理寺卿

薛抗

嘉靖浙江通志常州武進人隆興初令寧海清介絕俗甚有政譽邑濱海水鹵民甚苦之抗於

邑東北廣度坊側鑿井得泉甚甘為亭於其上以便民汲自後次第凡開八井邑人利賴名曰薛公

井

趙思

赤城志蘇州人乾道八年以左奉議郎知台州民有即山疊石以耕者或請籍其賦思奏除之

詔簡卒赴行在所有不樂者欲為變思善誘其去徐物色為倡者黥之孝宗謂措置得體記名御屏

尤袤

宋史本傳字延之常州無錫人紹興進士累遷著作郎兼太子侍讀與郡得台州前守趙汝愚

修郡城工纔什三屬袤成之袤按行前築殊鹵莽亟命更築加厚數月而畢明年大水更築之墉正直水衝城賴以不沒會有毀袤者上使人密察民頌其善政不絕口乃錄其東湖四詩歸奏上讀而

歎賞遂以文字受知除淮東提舉常平進直祕閣

**李兼**

嘉靖浙江通志宣城人博學工詩揚萬里推許之知台州居官有守既卒吏民為之巷哭罷市

**黃縉**

明一統志知台州勤苦夙夜先勸後禁訟牒銷縮郡稱平治為濟糶倉為抵當庫募民之栖寄

暴露者為棺千五百置養濟院又創安濟坊以居病囚皆自有子母錢使不廢

**丁大榮**

天台縣志毘陵人慶元間知天台縣主管農桑公事除差役之困斗糶之艱修廢興利民

甚德之又捐俸刻天台圖經

**孫若無**

赤城志慶元六年知臨海縣催科不擾以糜費錢輸下戶租以憂去

**楊圭**

萬厯黃巖縣志字國瑞建安人嘉定二年以奉議郎知黃巖縣修復經界勦利涉橋與唐守仲

友同時人稱利涉之功過於中津云

齊碩

赤城志青社人嘉定十四年以宣教郎知台州開貢闈修中津橋復經界補額台州府志郡舊

無志前黃守帶請陳耆卿修輯未就而去碩續成之郡之有志自此始

趙善惠

赤城新志嘉定間知仙居縣事愛民如子值歲饑徧走拯給民懷其惠為立趙長官祠

劉棟

臨海縣志寶慶二年知臨海縣事律已以廉御民以寬鄉無邏卒固無錮囚時臨邑儒學未建

初附於郡庠被火寄於石佛廢寺中棟至歎曰人才之興由學校始邑無學可乎乃首建學宮以敷教化又取邑士之題名慈恩者刻諸石

楊文仲

宋史本傳字時發眉州彭山人寶祐元年登進士第升國子博士勾外漆差通判台州故

事守貳尚華侈正月望取燈民間吏以白文仲曰  
為吾然一燈足矣勸農東郊守因欲泛湖文仲即  
先馳歸召為宗學博士遷  
太常丞兼崇政殿說書

**章敏子**

台州府志為仙居令瀚剔夙弊吏不敢欺尤  
作興學校後令夏嘉一遵敏子所為並著聲

稱號為

章夏

**程崇**

嘉靖浙江通志歙縣人淳祐進士歷大理寺丞  
出守台州抑絕權豪甚有政聲先是府治後山

妖狐變幻崇  
至潛伏不見

**徐默成**

仙居縣志博學善談兵為仙居尉暮月值呂  
寇之亂奮不顧身率勇敢與巡檢鄒進合力

堵禦戰不利  
罵賊而死

王華甫

赤城新志初為黃巖令景定元年守台擊強扶弱正經界均賦役歲連熟民為之謠曰若

無王知州爭得碗飯磕鼻頭  
當時言守令者以為稱首

趙子寅

臨海縣志端平二年涖臨海任有遺愛咸淳六年又以編修守台賑饑修城民益懷之沒

無所歸子孫遂家於台度宗聞其賢贈直祕閣給官宅一區田二百畝養其孤以旌廉吏

元

王銳

臨海縣志字進卿至元間宰臨海在任十年廉明愷悌民甚安之二十六年發寇延及邑境邢

萬戶帥兵殲寇欲抄黃奢銳赴軍前爭辨軍士以刀磨其頸銳益力民賴以全黃奢民立祠祀焉嘗建邑治書泚政歲於廳壁以自警

楊澤

赤城新志以從事郎為黃巖縣尹存心恤民父老肖其像祠於城隍廟

朱霽

蘇天爵朱霽神道碑字景周初襲父官為淮東大都督知揚州元貞改元轉台州路十年總管

衢州路延祐三年進通議改徽州路台州土不宜桑官歲征絲續於民民轉市於他所霽請止輸其直民甚便之或言郡產白金可以克貢行省命霽行視霽曰此作俑以害民者也力言無有議遂寢他若賦役之苛鹹鹺之擾纖悉委曲皆為條約以釐正之台人以為德黃巖歲饑霽曰拯災恤民守臣職也俟報而發民無餘矣亟出官粟賑之全活萬人海有劇賊數百恣行剽掠舟人患之霽擒制渠魁置於理餘黨聞之皆潰衢之西南黃陵堰溉田數百萬頃霽曰此農政先務也庀工完之霽所至廉平政理名聲流聞吏民愛慕豪強畏服

趙雲甫

台州府志元貞二年以武略將軍知黃巖州事時擬於黃巖置戍雲甫以密邇台營力陳

利病議

遂寢

趙敏中

台州府志大德元年任仙居縣尹明而能斷人皆服之凡利所當興者無不竭力以舉必

得實効乃止  
有古循吏風

韓國寶

赤城新志以武略將軍知黃巖州事修學官平冤獄興水利

茂巴爾

台州府志大德六年以奉訓大夫為黃巖州達魯噶齊潔已奉公得守臣體去十年父老

作去思碑  
於澄江

劉慶

赤城新志大德十年任天台縣尹鑄累朝勸學詔旨以勵生徒



佟復

台州府志東平人皇慶元年任天台縣尹多惠政修儒學浚九女磽渠通水灌田民獲其利呼

為佟公渠

白凱

赤城新志奉定三年以奉訓大夫知黃巖州事嚴明鎮靜吏民懷之

王居敬

赤城新志至順三年以亞中大夫為台州總管清修苦節視民如子置中津橋田以絕吏

奸台民賴之

月彥明

台州府志元統中為台州錄事司達魯噶齊縣未有學首建孔子廟延儒士為之師以教

後進

林興祖

台州府志字宗起福州人以進士為黃巖州同知廉而愛民境內大治有循良聲

張元永

台州府志字文遠東安人至正十年任臨海縣尹興學校禮高年均力役民有訟諭之和

頑不服者始刑之時行郊野集民間子弟與論耕桑樹畜謹身孝養之道歲旱請蠲租上官以文折之元永力爭乃得免每平反大獄民頌其德既去立石思之

周璉

天台縣志字國器由進士令台剛介有守政聲大著陞本府通判

趙琬

元史趙璉傳琬字仲德仕至台州路總管至正二十七年方國瑛以舟挾琬至黃巖琬潛登白

龍舉舍於民家絕粒不食人勸之食輒瞑目卻之七日而死

明

范明敬

赤城新志湖廣人洪武元年知台州府時海寇陳敬仲肆掠鄉邑一境騷動僚佐皆驚愕

失措明敬曰毋恐吾當自行  
即至枯蒼募民兵勦平之

唐宏

赤城新志洪武元年知黃巖州  
修政立事愛民禮士境內帖然

王士弘

史槩潞州人寧海縣知縣洪武七年海警吳  
槓領沿海各衛兵出捕往浙東收籍方氏台

溫明三郡故兵三郡亡賴挾私逞怨蔓引平民富  
家為兵瀕海大擾士弘曰誣良民為兵不可吾寧  
獲罪死當為民請命即上封事言狀辭甚  
懇切上即日詔罷之三郡之民賴以復安

芮麟

史槩字志文宣城人洪武間以太學生授台州  
知府明於治體吏民畏服嘗註誤被逮父老泣

送境外交遺之金不受  
後以薦授建寧知府

唐伯逸

赤城新志南昌人洪武間為仙居尉涖政公  
庶撫民有術嘗歎曰若取小民財物如驚鷲

股上割肉後  
陞縉雲知縣

周公輔

名山藏為寧海丞邑有瀕海塗田五十餘頃不勝稅公輔為民請命未施行復奉檄役民

二萬為象山縣築隄黃巖縣浚河公輔曰吾縣當築當浚者殊多歲乏不易無敢輕役乃役民為旁縣乎復欲以聞同官曰君奏未行又再奏耶公輔歎曰古有屍諫死吾身而有救於民庶上聞之乎遂雉經於官舍

王輝

赤城新志河南人洪武中以監察御史知台州府不攜家屬獨與父俱僕隸給薪水之餘不留

於舍為政廉明嚴毅  
吏畏其威民懷其惠

張源

萬厯寧海縣志成都人洪武中寧海縣丞先是邑稅虧兑自源到追徵有方以時完足陞戶部

主事

吳仲勝

赤城新志洪武間為台州推官貌恭而言訥郡守高璞初甚易之旬日間淹獄悉理人皆

服其明然時僚佐競為奢靡仲勝獨以蠶鹽自甘公退惟讀書而已

龐惟方

赤城新志洪武十二年知臨海縣為政平恕民有爭訟必從容諭之使之自服舊浙江通

志陝西延安人督造海船徭役咸有條理民不知擾

王謙

赤城新志南昌人任臨海丞居官清慎愛民如子信國公湯和按郡獨加稱賞去官之日行李

蕭然父老多追贖之一錢不受

周悌

萬歷黃巖縣志福寧人洪武三十年以監生知縣事德性淳厚政平訟理勸農桑興學校民咸

思之

張誠

台州府志字則民安仁人洪武三十二年由監生任天台縣丞催科平涖事敏以民病累歲逋

賦佐令張時習請於朝得折鈔民甚德之陞臨海縣令任滿陞治中出守交趾

王英

寧海縣志蘇州人知寧海縣斷獄明決人不敢欺先是歲洊飢邑多盜英至望風潰散厯官山

西按察使

張時習

天台縣志樂平人洪武三十二年令天台修學宮繕城隍民不知勞秩滿去老幼攀轅不

忍別

江恕

明一統志永樂初台州知府有惠政嘗建言水利及軍衛儲糧之弊民甚便之

康彥民

嘉靖浙江通志江西泰和人洪武進士永樂初為天台知縣罷官家居宣德初巡按御史

至天台民二百人言彥民廉公有為乞復召為縣以慰民望御史以聞吏部言彥民罷官十餘年難從所請帝曰其人罷去久民猶欲之必有政事及民召用為江寧丞

張約

仙居縣志曹縣人永樂元年由太學生任仙居縣居官精勤始終著清節慈祥不苛民甚德之

戴新

赤城新志山東人永樂初由進士知台州府勤儉公平有循吏名終雲南布政使

魏澤

世法錄字彥恩溧水人有學行謫寧海典史逮捕方孝孺藏其幼子以故方氏有遺種謝遷詩

所謂孫枝一葉是君恩也

鄭光與

天台縣志永樂間知天台縣事居官不擾節冗費省徭役民甚便之

殷序

萬應黃巖縣志無錫人永樂中以進士知黃巖縣廉潔仁恕政事修理士民頌聲不絕歷陞江

西四川雲南布政使

周旭鑑

獻徵錄貴溪人知黃巖迎者待界上旭鑑已潛入邑中盡得諸豪主名一日坐庭中召諸

曹與定約束未數月紀綱設張衆相戒勿犯文廟毀於颶師生處草屋數椽撤而新之奏減軍糈及風傷田禾度逋稅不能償者達於監司請代以鈔編戶貨產高下之數悉籍記之於是賦平徭均逃移復業民飲苦鹹而病乃鑿山引泉入市以便民汲縣北利涉橋久廢不葺往來濟以舟過漲多覆旭鑑輒復之西鄉山多虎捕之不獲過一祠因與神約厥明虎不獲且焚祠是夜夢神告虎所在如其言往虎皆就戮歲甲寅大旱禱三日而雨槁苗復甦是歲民間麥秀五穗桑生駢枝又有靈芝及



一乳三子之祥邑士大夫因繪四異圖以紀其事  
陞台州府通判仍掌黃巖縣事賜璽書有廉潔公  
勤之褒正統甲子台守以事罷閩郡軍民上章願  
補旭鑑上特從民請涖政一如在黃巖時而崇禮  
教飭信令正己勵下興學舉賢尤注意焉歲己巳  
處州山寇葉宗留倡亂朝廷命將勦之勅旭鑑督  
義兵往贊其謀既行台民屢疏請還旭鑑以處郡  
據枯蒼之險奏置巡檢司增兵防禦時鄰郡皆騷  
動獨台晏然陞浙江布政司右參政仍掌府事卒  
台人立祠以祀之

### 程賢

赤城新志真定人宣德間由監生以刑部員外  
郎知台州府時郡城軍強民弱賢繩以法軍以

更漏虐民乃更建齊政樓俾民司之衛不得奪郡  
有三關中津屯頭關嶺皆軍為之暴悉革去之

### 童文

台州府志應天人以進士任監察御史宣德間  
知臨海縣事涖下端嚴存心坦易尤持以勤恪

嘗奏寬官田租以舒民力興廢舉隆不勞而集丞簿以下惟仰成而已

謝恂

嘉靖浙江通志武進人宣德三年以監生知臨海縣事一介不取於民自奉甚薄日再食明發

賅事夜分而退民以事至庭諄諄戒諭凡利當興蠹當去者沮以權力勿顧也後知平陽府

劉剛

台州府志江西泰和人正統四年知臨海縣每昧爽眎篆必戴星始罷外戶肅然苞苴杜絕嘗

捐俸修文廟葺中津浮梁役興而民不知擾時霖雨害稼積誠以禱俄頃而霽

阮勤

台州府志交趾人由進士以大理寺正擢知台州府事修學校建鄉賢祠及上蔡書院歷刑部

侍郎致仕

張韶

赤城新志景泰中知寧海縣適歲大飢民多殍韶先發預備倉賑之然後奏聞又抽已俸煮糜

粥以食之  
存活甚衆

劉忠

舊浙江通志山東人天順間以監察御史知台州廉明端方不阿勢要任久有惠政仕終副都

史御

孔彥綸

赤城新志句容人宣聖之裔由舉人天順七年為台州通判廉而愛民始終一致秩滿卒

於官貧無以  
殮民爭購之

郭紳

史槩字廷章宜春人成化乙未進士授寧海知縣方孝孺縣人也事淹國禁紳至首刻正學集

創祠祀之擢御史歷  
南京刑部右侍郎

袁道

台州府志字德純吉水人成化十年由進士任太平知縣涖政廉平視民患如在己有強盜誣

指應華等二十三人司府已鍛煉成獄道力為辨  
理至以去就決之華等得白備倭張勇以沿海倉  
糧腐折責償於民郡縣莫敢後道獨與抗曰糧在  
倉而責之民吾官可去實不能以是令民張亦無  
如之何黃巖縣界有賊殺捕盜官姜昕民驚悸幾  
激變道亟至其地招諭之曰獨殺人者死耳無憂  
也民以不擾豪民持官府短長武斷鄉曲者悉寘  
之法新學校建鄉賢祠行保伍法糾察奸宄廉請  
耆宿主鄉約月朔呈報善惡以示勸懲布衣有行  
誼者必躬禮其廬疏治迂浦開興水利歲以大穰  
邑西樂清民聞其風皆願屬乃奏  
割東南六都隸焉仕終監察御史

褚祚

台州府志字昌應常熟人成化十年以進士知  
臨海縣持身莊職動有準繩修學校築堰開理

橋梁多著成績而財無浪費民甚德之陞御史常  
熟縣志臨海縣有嶺雨三日淖陷則米薪斷絕民

有飢者祚發工調役治之雨不為患邑人名其巔為褚公嶺

**葉贊**

台州府志山陽人由進士成化十八年知台州府廉靜守已治民以仁愛甲辰歲歉民稅無措

力為奏免民賴以生以憂去仕終副都御史

**范亮**

太平縣志甌寧人成化十九年任太平縣丞慈祥廉慎勤恤民隱署邑事修學宮兩廡繕治鎮

東橋歲早素食草履祈禱甘雨如注罷官日貧無以歸父老相率贖之一無所受

**張弘宜**

寧海縣志字時措華亭人進士成化十八年任寧海知縣明察剛斷大家怙勢作威者縮

首斂跡而小民為之吐氣詞牘累幅一覽而盡裁答無遺點吏無所措其手

**錢本弟**

寧海縣志四川人寧海典史有幹才時邑人移惟英恃勇殺人聚徒象山依憑險阻大行

剽掠人莫敢當其鋒本弟  
假道襲捕擒之百姓安堵

**戴韶**

寧海縣志任寧海典史清慎有為寧海故有埧  
壓田土該糧三千七百石民苦浮賠韶疏於朝

每米一斗折納銀三分七  
釐糧不虧額而民稱便

**江澂**

寧海縣志字景吳江西南城人進士弘治元年  
知寧海縣浚事公勤每日黎明必北向再拜而

出臨民以誠信為本初瀕海民苦埧江塘稅澂覈  
一邑之田得欺隱及新墾五百餘畝克補糧額民  
得少甦後  
陞僉事

**陳釗**

臨海縣志蒙城人弘治三年以舉人知臨海縣  
政尚簡靜一儒生與宦族有爭竟以理折勢莫

能撓之刑清賦省在  
任十年閭里宴然

方印

舊浙江通志字與信桐城人弘治間知天台廉以潔已仁以愛民閩邑利弊靡不興革甫一歲

教化大行卒於官囊俸僅八銖父老咸咨嗟嘆息建祠繪像祀之

陳相

舊浙江通志泰州人弘治間知台州府守己以廉撫下以仁任內屢獲豐年積穀殆將十萬舉

廢備賑人皆德之

陸琪

舊浙江通志吳縣人弘治中同知台州剛毅而濟以寬嘗署府符事無停滯尤注意學校秩滿

去民擁留之

母恩

台州府志蓬州人弘治十三年以進士知臨海縣剔弊補漏政令一新尤如意學校親為諸生

講解輯頒家禮戒飭懇懇人樂從之陞監察御史

劉弼

太平縣志字邦直華陰人弘治十六年由進士任太平縣政事以表道為師表修學校清刑獄

勸農桑民翕然稱之調知黃巖

馬岱

台州府志江都人進士弘治二十年知台州府恩澤及人甚溥民以疾病來雖冗沓必與以良

劑貧不能葬者助之府治及兩學改作一新於民無擾

盧英

台州府志由黃巖縣調知太平清約端嚴一如治黃以事至司府及行都鄙皆自賫饌具一不

以煩民審里徭役甚均尤詳於治獄催科第嚴限程不事筮楚顧嚴於吏胥及勢要之家一犯科條輒置之法不少貸暇則校試諸生為說作文講書之法考滿上京囊橐蕭然擢戶部主事

張羽

萬歷寧海縣志字鳳舉泰興人正德進士知寧海縣廉能剛介抑豪右惠困窮風裁凜然行取



擢御史劾劉瑾被  
謫歷官副都御史

喻茂堅

台州府志字汝礪重慶人正德九年以進士知臨海縣為政持大體在任多所建立去後

人思之立碑建祠  
仕終刑部尚書

郁浩

台州府志字子淵永州人進士正德九年任天台知縣廉慎明決平徭役恤小民人畏愛之調

知西  
安縣

祝弘舒

舊浙江通志溫江人正德間任太平縣綜理有方剖決無滯吏民不敢欺

毛馭

寧海縣志麻城舉人正德間知寧海歷任九載連遭水旱緩征薄斂勞來安集惠政及民

傅清

萬浙江通志詔武人正德間臨海丞時亢旱禾稿清虔禱百神勿應輒自引咎以鐵縲繫頸當

午塗拜既而大雨如注

張巖

臨海縣志彰德人正德間為臨海主簿才識練達每有催科單車慙山谷撫循勸諭不答一人

而課最所司牒委紛至先期事集

曹廷桂

仙居縣志武進人正德十五年由舉人任仙居縣性廉敏居官七年案無留牘有便民者

暮計朝行綽有政績

羅僑

名山藏字惟升吉水人以進士知台州府興學禮士愷悌宜民訟者至與款語利害多解去歲

時循行阡陌舉冠婚喪祭禮以教民布衣張屐賢而貧僑禮之上坐訪民間疾苦凡具以所聞告僑為置童僕給侍尊禮之台人多興起者擢廣東參政去獻徵錄台戍衛食倚各郡餉前守漁其中即

溢取膏出之入覲治裝咸苦民僑首除羨餉而覲行自給無他與吏部上守令殿最以僑為第一賜襲衣牢醴旌異之在台建祠祀方孝孺置祀田若干畝

毛衢

台州府志吳江人嘉靖二年由進士知太平縣明敏有才先是市豪類包攬里徭二役侵漁都

鄙衢革去之進田野小民服役公庭教以禮法民悅甚迂浦街有金星閣橫湖堂有神祠歲斂民錢為穿臂會云能消災致福遠近如歸市衢毀其閣與祠曳神像火之罪主者數人害遂息民苦盜竊選飭游徼捕盜賊知名者悉瘐死獄中尤重學校調永康後官至副使

王欽

萬厯黃巖縣志候官人嘉靖三年以進士知黃巖縣愛民禮士弊政悉除修葺學宮大興文教

周振

常州府志武進人正德舉人今天台以興學善俗為首務天台有橋當要道橋長而水湍振禱

於神橋成邑人名  
晉陵橋立祠祀之

唐愈賢

寧海縣志字子中辰州人嘉靖丙戌進士知寧海縣謁陽明於會稽得良知之學居官倦

倦以勸學明道移風易俗為己責至於剔蠹剪弊扶弱抑強均田平徭張施措置悉當人情在任四

年民懷吏畏  
擢南臺御史

劉贊

萬厯黃巖縣志宣城人嘉靖八年以舉人知黃巖縣廉勤剛正秉法不阿豪右為之屏息人稱

劉硬頭陞成都府通判民攀轅不忍釋有赤子泣別碑

陶秀

台州府志字子實南城人嘉靖十一年由舉人知太平縣先是里役不均田多脫漏秀編造黃

籍設為十甲均田之令又清稽脫漏田以充舊額民甚宜之瀕海故多軍衛莊田弗屬編管秀建議

立為軍圖三服役視齊民又墊甃道路起皇  
華息肩二亭築治義塚民益惟悅調高淳去

方介

黃巖縣志字子和合肥人嘉靖十七年以義烏  
令調知黃巖廉公有威痛繩豪右時有琴堂第

一方  
之謹

周志偉

台州府志字士器南康人進士嘉靖十七年  
任台州知府大興學校日與士子講解經義

時黃太頻海諸地潮沖開壞比歲不登志偉請於  
御史傅鳳翔特疏建開又請復河泊大使以司啓  
閉兩邑自是歲有秋時有大姓楊某者爭田構訟  
累歲不止志偉親往按視開示大義且諭以詩於  
是感泣相讓民  
為勒石頌之

張士賢

寧海縣志江西人嘉靖間由舉人知寧海縣  
躬行節儉先德化而後刑罰有古循吏風

劉子與

台州府志海陽人嘉靖二十一年以進士任臨海令廉幹有惠政

黃允謙

寧海縣志廣東人嘉靖十年進士知寧海縣初姓黃復鍾姓以經學飭吏治蒞事嚴而有

法庭無私謁新民黜吏莫敢欺建社學置社田留心教化陞主事歷官萊州知府

胡叔廉

台州府志字明發江西新淦人嘉靖十八年以進士知臨海縣時邊海洪潮驟發淹沒者

數千家叔廉單車走鄉落死者躬親瘞埋被災者發粟賑卹全活無數留意學政文廟自正德二年

燬暫徙元妙觀叔廉復建於故址廊廡齋舍煥然一新

張育才

萬厯黃巖縣志壽州衛人嘉靖二十年以選貢為黃巖丞廉介自持公餘即荷鋤藝蔬以

自給陞句容令

陳堯

台州府志通州人嘉靖二十一年任台州知府值兩歲水患多方拯救廉敏寬仁闔郡德之仕

終刑部侍郎

高材

黃巖縣志字克甫無錫人嘉靖二十九年以舉人知黃巖縣之官不攜家累止以二力從愛民

節費齋廚索然嫉惡如讐奸猾民抵法輒痛繩之性簡亢即權豪不少屈至接士類則脫略勢分有下榻倒屣風會倭變免官民走請於朝留之不得立祠肖像祀之

馬濂

台州府志字濬卿無錫人進士嘉靖三十年授仙居令為政尚大體存靖難忠臣鄭恕後而復

其產倭寇及仙濂率民兵與郡守宋治邀擊之賊遂逸尤著清節去之日父老歌曰民送兩行淚官

行一  
擔書

汪汝達

黃巖縣志字志行無錫人嘉靖三十二年以進士知黃巖縣自倭變後邑里為墟汝達繕

城堞濬河隍建先師廟改淫祠以祀朱子置學田以贍貧生一時興廢舉墜皆有裨政教陞戶部主事

蔡結

臨海縣志字國凝漢陽人嘉靖三十二年由進士任臨海縣時倭寇歲擾兵興役煩結調度有

方事集而民不擾合邑安堵

方輅

台州府志任太平知縣嘉靖三十二年值倭變無城垣輅營費創築民藉以安

林大梁

寧海縣志福建同安人由舉人嘉靖庚戌知寧海歷任九載治尚寬平倭寇江浙關廣四

省騷動邑故無城民甚恐大梁力請於當道建築城垣為民保障城甫完倭猝至登城拒守民賴以



安

胡價

台州府志號玉吾宜城人嘉靖四十二年以進士任臨海縣精敏有才略案牘駢集剖決無不

適當吏不敢欺民懷其惠陞給事中

余城

台州府志江西鄱陽人嘉靖四十三年以舉人任仙居令先是邑遭倭變又經城役郡司李蕭

文清督責過嚴民財力俱敝城至竭力撫循流氓始集尤不阿權貴務絕請托以中傷去官

楊廷表

萬歷黃巖縣志甌寧人嘉靖四十三年以舉人知黃巖縣愷悌愛民立丈量法精密不苛

而宿弊頓革調東昌去民思之肖像祀焉

楊道會

黃巖縣志字惟宗隆慶二年以進士知黃巖縣年踰弱冠清約如寒士諳練如素官吏胥

不敢肆其故智徵科第嚴程限不事夏楚窮民積逋悉停之歲校士精覈復賑其寔者士為奮興禁淹女全活甚衆舊鄉飲賓濫及匪人有司亦以彌文略之道會必得其人造廬禮焉陞戶部主事

**周思稷**

台州府志號養初湖廣麻城人隆慶戊辰進士知臨海縣慈祥廉靜有古循吏風在邑五

年嘗清丈田畝稽核丁口不事察察而人不欺又酌定鹽課上下利之陞戶部主事

**向大有**

舊浙江通志辰州人萬厯間任同知在台五載嘗三攝郡篆有守有材人稱古之遺愛

**武煒**

台州府志台州府知事壬子倭入黃巖焚劫時承平日久聞者皆股栗欲竄煒獨挺身率兵往

援至釣魚嶺倭設伏山谷間力戰不勝遇害事聞贈太僕卿建愍忠祠於巾子山春秋致祭

**曹學程**

舊浙江通志字希明全州人令寧海以厚風俗阜民財興學校為已任逾年百廢具舉時

有芝生麥岐之瑞頌  
聲四訖擢屯馬御史

王演疇

寧海縣志字孟箕彭澤人萬歷壬辰進士為寧海令下車即建社倉廣養濟院又因南觀

廢址闢為縣城書院增置學田四百餘畝  
俾邑士子肄習於中後知桂林府致仕

湯聘尹

台州府志江南長洲人進士授給事中萬歷十年出為仙居令為治務節冗費并里甲濬

水利改鋪舍有利於民者  
圖之惟恐不及民甚戴之

吳正大

台州府志休寧人萬歷九年為仙居主簿剛介自持不媚權貴攝縣事併課清丁法良意

美大僚子姪殺人必得其人以  
置諸法時稱天下清官第一

周孔教

台州府志號懷魯江西臨川人萬歷庚辰進士十二年知臨海縣性敏操卓經畫皆可垂

久義倉社學次第舉行治以教養為先向來所需器具辦自坊長日用資於館戶孔教一切革去皆官自庀設不以一毫累民治事暇與諸生講學論古一時士習丕變後擢御史

張邦翼

寧海縣志號軫南斬水人以進士知寧海縣時西郭外泮水蓄城率民修砌壩堰至今賴

之築勢馬山塔以培文脈調繁臨海

晏文輝

台州府志字懷泉南昌人進士任太平知縣修祭品葺學宮俱捐俸為之絲毫取於民

躬迎耆老以勵俗請表貞婦以維風士民皆翕然向化至鋤奸除猾風烈矯矯循河造舟濱海除道

美政  
甚著

顏欲章

寧海縣志安福人萬厯中由進士知寧海縣處心恬靜與民休息以北門濠水直瀉不利

於邑改抱城闔布橋以通往來調繁嘉興士民挽  
留不獲遂於淞畔置祠名曰顏公河歷浙江布政  
使

周家棟

台州府志號鶴陽黃安人萬厯己丑進士知  
臨海清理徭役弊剔而民懷之課士論文決

科第皆不爽邑之儒習彬彬焉築湖隄尤利及永  
久陞御史巡鹽本省老穉遠近數百里擁馬足歡  
呼曰此我曩  
時父母也

翁仲益

太平縣志字受甫晉江人由進士任太平縣  
值歲飢即請緩征賑濟天旱每禱輒應旦出

視事吏人持文牒鵠立無  
一敢窺伺者後調繁去

王明欽

舊浙江通志晉江人萬厯中知仙居冰蘖茹  
飲不以一錢自汚時有簿會學周南豐人以

廉能稱相  
得助理

張弘代

天台縣志靈壁人萬歷二十二年任天台縣  
識度凝重操守清廉興利革弊常修邑志以

循良擢戶  
部主事

汪夢說

台州府志貴州人萬歷二十六年以舉人知  
仙居縣禮士愛民修明倫堂其政與王明整

相上下時有間架之稅夢說以民  
貧強項不奉法郡守強之不能得

王孫熙

天台縣志華亭人萬歷二十九年以進士知  
天台縣公廉慈惠練達精敏陞大理寺評事

民戀不忍釋後陞本  
府知府擁道歡迎焉

李應祥

台州府志號雨亭無錫人萬歷丁丑進士戊  
寅任臨海令清白自矢時倭亂後水荒相仍

應祥朝夕拮据彈心撫字賑濟全活者數千家諸  
所經畫如定條鞭除糧長釐風弊一十四條皆斟酌  
盡善時論謂清慎勤三善實兼有之後陞主事

**林光庭**

寧海縣志字仲明莆田人萬厯進士任寧海  
縣敷政寬平而御下嚴肅尤銳意作人增修

齋館政餘就義學談藝勸課復創建  
文昌閣置田供祀歷陞武昌知府

**胡懋道**

寧海縣志字寧鄉人任寧海丞兩署邑篆清火  
耗革常例邑偶飢民赴府市米驛宰每肩索  
米少許懋道廉知之遂懲其役復  
達上官禁諭之後陞濟寧州判

**吳綱**

台州府志字內閣增城人萬厯甲寅以舉人知  
黃巖縣至即誓於神勿私入一錢歲祲不忍追  
呼府檄趨軍餉甚急民恐負乘燭爭輸不終宵有  
溢其額後左遷福建都事尋改樂清諭任滿經黃

巖客舍百姓相與扶輿入公館  
拜謁者日以千數擁傳不得行

胡來聘

天台縣志全州人萬歷三十八年任天台縣廉介慈和精密果毅吏服神君民歌父母尤

加意黷宮主持風  
教士民佩德焉

喬時英

台州府志上海人萬歷進士任臨海縣宅心仁厚清望峻絕除蠹剔奸積弊盡革卒於官

王國材

舊浙江通志號椒邱上海人初知黃巖調繁臨海賢聲如一適巡眎邊海方回以亢旱連

晨步禱行至  
縣門而卒

唐世輔

台州府志桂林人舉人天啟壬戌知黃巖縣時里役苦於解餉下車即革去以官封運解

歲省費

甚多



胡接輝

舊浙江通志江西廬陵人天啟中知天台清介視躬仁慈接物嘗講學友仁堂捐俸緩修

文廟秩滿  
陞御史

陳起龍

舊浙江通志海澄人天啟間仙居令凡訟者以善語解之民愧悔乃罷日與文士講學謁

如家人去之  
日囊橐蕭然

謝堅

台州府志字用礪信豐人天啟五年以舉人任太平縣里役舊有陋規歲輸無名之賦堅於正

項外一無所取汰冗役嚴保甲繕城隍善政具舉崇禎三年陞員外郎

李天秩

台州府志號止菴雲南人由省薦授台州司理明末吏治剝敝天秩至廉積猾鉅蠹數輩

立置之法問民疾苦如負重病在身興除不旦夕緩同官太守性嚴急於人不少貸一日語微侵天

秩天秩曰節推法官也公已代專之何忍更為東  
濕太守愧謝自是事可否必咨天秩而後行直指  
檄同巡歷所過積牘如山頃刻裁之各愜其情而  
去務矜全小青原而出者郡必十數人至墨吏大  
豪論竟如律雖威刦利誘屹如也事畢裹糧他去  
不費縣官一粟前後直指上其治行第一轉兵馬  
司指揮去之日單騎襆被嚮書史以自供  
百姓環馬足泣者數萬人後遷兵部主事

劉士名

舊浙江通志潁州人崇禎間黃巖令為政嚴  
肅晨起放衙左右却立案側罔敢抱不急之  
牘以進大庭之上儼若神

明攝太平篆政如治黃

蔣鳴玉

台州府志字楚珍金壇人崇禎丁丑進士任  
台州司理諸所釐剔皆有聲講明理學與諸  
生課藝論文指授矩度以台郡解額頗減植南北  
兩山蔭木以培地脈時臨邑周令壽明亦雅意作

人與鳴玉所賞識者皆後先得雋

馬鳴霆

台州府志字瑞霞楚雄人領鄉薦崇禎十六年知黃巖縣吏治明敏理紛錯如抽絲校士

尤虛心檢閱各因其材造就之明年海門兵譁進掠監司內署隨至黃巖不搞譟擾衢巷鳴霆陽為款慰授計捕兵合衆殲遂民賴以安陞刑部主事

國朝

李士弘

台州府志字仔肩河南磁州人順治五年由貢生任台州推官性廉介執法不少徇時台

初定悍弁縱恣士弘一繩以法城鄉之人始獲帖席仙居防將趙德悍而黠陰令所俘盜扳報平民會巡撫蕭起元檄士弘蒞仙居督師趙畏其節制不敢恣民咸相告曰李公生我及去任出郊數四

輒為士民擁還不得行者累月  
至新昌為賊所害崇祀名宦

鄭之文

舊浙江通志字衷素山東臨清籍休寧人武進士任台巡道中軍康熙十三年馬信內叛

執署道傅夢麟於興善門城樓之文抽刀欲殺其黨自後踣之為所縛既而以計脫歸十四年城陷之文自誓殉國先令二妾投繯賊執之文去終不屈遂被害事

聞

廕一子世襲拖沙喇哈番

徐化成

舊浙江通志順天昌平州人順治八年由貢生知台州府寬徵省役與民休息奉母至孝

一切笞杖不敢妄施悉遵母訓台州府志化成字文侯為人謙恭平恕甫下車值亢旱虔誠步禱甘霖隨沛鎮兵月糧偶缺譁於途檄催黃太二邑米暮夜適至兵利在舟即給化成慮有變詣江許運

貯天寧寺倉猝夫不繼化成徒步率衆役挽攜百姓聞之爭先來助頃刻而畢升合無耗陞山西岢嵐道副使仕至湖廣巡撫

蔡含靈

舊浙江通志字子虛北直寧晉人順治丁亥進士知天台縣居官清慎有經濟才時值寇

警團練鄉勇多方招撫山寇悉平凡遇經過官兵區置得宜民賴以安扶滿陞工部主事歷河南睢道陳

劉登科

舊浙江通志連東人順治十三年由監生知黃巖縣十四年海鯨陷城脅降不從繫之入舟

再脅終不屈遂縛投三江水巾士民哀之

張中選

名官留祀冊字龍城湖廣沅州人康熙二年由生員特授黃巖知縣在任八年利興弊革

多方開墾以安集流民廣設粥廠以賑恤災黎寬刑減耗建造學宮振興文教

**趙廷錫**

名宜留祀冊庸施人順治辛丑進士康熙九年知天台縣興起學校會文課士親為評閱

公編審平徭役革弊政申減水衝虛稅災荒賦額民沾實惠修邑志未竣以憂去

**周貴**

台州府志號榮吾直隸東寧衛人康熙十年任台州副將在台三載捍衛封疆海鯨遠遁舊時

軍中買穀辦料及油薪茶炭之屬無不取資民間貴悉除去申飭軍令凡官兵借住民房務令主客相安強橫者置之法民為勒石紀德

**王鑄鼎**

台州府志字象九瀋陽人例監生康熙十三年知臨海縣時寇盜充斥援旅雲屯鑄鼎掘

濠築屯親冒矢石辦餉給夫及寇退繪圖祈賑陳疏籲蠲立催科之法止查花戶完欠除去現年圖


差名色民稱利便以積勞  
成疾卒於官年僅二十五

閔福玉

表忠冊青州安邱人任黃巖鎮標左營遊擊  
康熙五十一年輪防北洋海汛五月二十三

日遇海賊陳尚義於牛頭門力戰陣亡營兵王一  
倫柯國柱等五十四人同被害事

閔贈副將廕一子閔灝以守備  
用王一倫等俱加卹賞



浙江通志卷一百五十四